

Disputatio Inauguralis Juridica,

DE

CRIMINE CONCUSSIONIS,

IN SPECIE

CIRCA OFFICIALES IN SUBDITOS,

Von

**Zwang und Druck der Beampte
wider die Unterthane/**

QUAM

Auxiliatrice Numinis Trisagii Gratia
EX CONSENSU ET AUTHORITYTE MAGNIFICÆ
FACULTATIS JURIDICÆ IN INCLYTA ACADEMIA
HASSO-SCHAUMBURGICA

SUB MODERAMINE

VIRI EXCELLENTISSIMI ET CONSULTISSIMI
DN. EDUARDI FRANTZ GOCLENII,
Juri & Pandectarum Professoris celeberrimi,

PRO LICENTIA

SUMMOS in utroque JURE HONORES ac PRIVILEGIA
DOCTORALIA ritè impetrandi

Publicæ Doctorum disquisitioni submittit

THEODORUS ERICUS ALTROGGE, Hannov.

Anno MDCXCVI. d. Sept. horis consuetis.

RINTHELII,

Typis HERMANNI AUGUSTINI ENAX, Academ. Typogr. MDCXCVI.

OPTIMO SUO PARENTI
BENEQUE DE SE MERITO

DOMINO

MELCHIORI
CHRISTOPHORO
ALTROGGIO,

OB BENEFICIA NON UNA NEC EXIGUA
SED IN DIES IN ANNOS AUCTA

ÆTERNUM OBSTRUCTUS
PIETATEM QUAM DEBET
CULTUM QUEM TRIBUIT

QUALICUNQUE HOC ARGUMENTO TESTATUR
TANTIQUE AMORIS SEMPER MEMOR

CUM GRATIAS REFERRE NULLAS LICEAT
HABITURUS TAMEN SEMPITERNAS

DISPUTATIONEM HANC INAUGURALEM
EXIGUUM MAGNÆ OBSERVANTIÆ PIGNUS

TRADIT

FILIUS TOTO SANGUINE DEVOTUS

THEODORUS ERICUS ALTROGGE.



I. N. S. T. A.

PRÆFAMEN AD
B. L.

OCulos hæcenus per immensam The-
midis segetem pluries volvendo circa *lib.* 48.
tit. 13. ff. in quo materia Concussionis sedem
habet, in mentem mihi venit, Anno 1652
sub Præsidio Dn. Bechmanni quondam Jcti & Profes-
soris famigeratissimi, non neminem nomine Frideri-
cum Heckenberg Jenæ disputationem Inauguralem de
BARRATARIA, qua cautum est, ut provincialibus à
Magistratibus corruptis, qui nempe in Provinciis pec-
unias contra leges accepissent, easdē repetere liceret,
publici juris fecisse, & cum deprehenderem alteram
speciem, quæ est de CONCUSSIONE CIRCA
OFFICIALES IN SUBDITOS, ibidem prorsus in-
tactam

factam esse relictam, operæ pretium fore censui,
 si eandem materiam in foro saluberrimam, pe-
 nitius trutinarem, ac ambiendo Honores Docto-
 rales publicæ disquisitioni subjicerem, haud im-
 memor, ejus, quod qui dissertationis alicujus elab-
 orationi manus admoveere soleant, illud sibi negotii
 cum primis suscipiendum esse credant, ut nova, nec
 cuivis obvia, imo utilissima, præferant; Ideo sine
 ulteriori verborum ambage opus aggredior, quod ut
 feliciter cedat, ante omnia me converto ad Deum
Nov. 85. in pr. quo sine nostra hæc in studiis peregrinatio
 miserabilis quædam erratio est, ut ait acutis-
 simus Scaliger. *exc. 359. sect. 1.* eum implorans, ut
 velit instituti mei principium, medium & finis esse.
Nov. 109. pr. Si vero Tuis B. L. haud exasse respon-
 dere quiverim votis, ea qua par est humanitate,
 quam mihi abs Te polliceor, hunc Te laborem æqui
 bonique æstimaturum, & defectus quos fortasse re-
 prehendes, faventi correctione adimpleturum con-
 fido. Tuo enim arbitrio ac censuræ, quod
 nunc sequitur lubens
 submitto.





CAPUT I.

Generalia quædam ratione Etymologiae, Homonymiæ, Synonymiæ, & Definitionis Exhibens.

THESIS I.



AMicus meus charissimus Dn. Joach. Johan Käseberg in erudita sua exercitatione de recta disputandi ratione, quam sub Præsidio Dni. Wiedburgii in Academia Julia habuit, in *tb.i.* ita scribit, quando ea, quæ Veteres circa disputationum fines observarunt, & hodiè circa easdem obtinent, attendimus, quosdam initioprehendimus in eruditam hanc arenam descendere, ut veritatem quidem astruant, falsitatem autem in apri-cum productam planè refellant, eosve cum quibus agunt, ab erroribus justo modo liberent, cui fini pariter & Nos in præsentiarum studebimus.

TH. II.

Cum autem plurimum è Re sit, antequam ipsam tractationem exordiamur, pauca de significatione ipsius tituli, qui est de Crimine Concussionis, in specie circa Officiales in Subditos, prælibare, nos, ut plenius hanc materiam interpretemur, neque illotis manibus in illam irruamus, necessarium duximus ipsam definitionem primò omnium aggredi, quemadmodum omnis doctri-

doctrina sive instructiva sive reformativa à vocabulorum cognitione & definitione initium sumit, siquidem turpe est prius determinare, quam terminos intelligere; tum quia natura ab Elementis incepit. *Farinac. lib. 1. proc. crim. qu. 36. n. 1. & 2.* Scaliger *exerc. 359. sect. 1.* ubi ait, à nominibus auspicandum, quia sunt notæ passionū animi. *Muret. in orat. 8. lib. 1.* Et neglectus vocabulorū rerum parit incertitudinem, sicut ē contrario intelligentia cognitionem. *Rutger. Ruland. de Comm. lib. 1. c. 2.* Sicut autem Definitio primum in omni arte præceptū; ita Duplex *ονομασίως* Nominis, & *παραγµασίως* Rei, quorum illa continet Etymologiam, Synonymiam, & Homonymiam vocabulorum, hæc proprietatem rei ostendit. *vid. Vent. de Valent. in Partib. litig. lib. 1. cap. 5.*

TH. III.

ETYMOLOGIA.

Vox Concussis à concutio dicta, vim ejus voculæ, ex quibus componitur de notant; nempè præpositio CON, quæ semper composita reperitur, & modo idem quod cum vel simul, modo quod contra, hoc loco verò, quod valde seu vehementer significat. QVATIO est altera hujus compositi vocula, mutando lit. Q. in C. & abjecto A, quæ in hac compositione sensum in Jure acceptum, nempè commotionem totius animi ob aliquam violentiam imminentem & quatenus concutiens dicitur, qui percellit & perturbat aliquem injecto terrore, exprimit *Calvin. in lex. sub voce Concutere.* Circa vocem, CRIMEN nempè notamus, quod descendat à cerno, sicuti à discerno discrimen, undè idem est quod contentio, seu criminatio & id quod per contentionem objicitur. *Blanch. in pract. Crim. §. visis indiciis. Farinac. in prax. crim.*



crim. lib. 1. tit. 3. qu. 18. n. 2. Crimen tamen latè acceptum omnia voluntaria delicta ex deliberatione provenientia continet. *l. 1. c. si advers. delict. Decian in tract. crim. lib. 1. cap. 7. n. 2.*

TH. IV.

Accepturi ergo sumus Vocabulum Concussionis (1.) non in sensu planè abusivo illo, in quo usurpatur apud Juvenalem *sat. 10. vers. 327.* Ne Sthenobæa minus, quam Cressa excanduit & se concussere ambæ, ubi concutere pro erigere se in ultionem sumitur, nec (2.) pro labefactare, in qua significatione audit apud Ciceronem in *Philipp.* sed pro actu illicito, quo quis per terrorem potestatis ab invito prætextu alicujus juris quid extorquet. *t. 1. ff. de Concuss. l. 1. l. 4. l. 5. C. de L. Jul. Repet.* quod per concussionem ubi metus concutitur & de mente fieri dicitur. *l. 6. §. 3. illicita ff. de Offic. Presid. Farinac. qu. crim. III. art. 3. n. 49.* In quo significatu concussionis nomen Metaphoricè sumitur, metaphora ducta, vel ab iis, qui ædificium ruinòsum concutunt, vel potius à furibus pomariis, qui quoniam fructus ex alienis arboribus adhibita morà legere non audent, arbores concutunt ut quæ poma ceciderint statim inde auferant. *Donnell. lib. 15. Capite 39. & ibi Hillig. sub. lit. A. Theodoric. in colleg. Crim. disp. 9. th. 1. lit. B.*

HOMO-
NYMIA.

TH. V.

Hinc apparet, quod Synonymiam attinet, Concussionem & pecuniæ extorsionem pro uno eodemque accipi, *t. 1. ff. & C. de Leg. Jul. Repet.* Solet hoc loco salebrosa illa quæstio moveri, sitne concussio idem quod non facere justitiam. Et quamvis idem sentiant. *Paris de*

SYNONY-
MIA.

de Puteo intr. de Syndic. cap. 7. n. 6. Dam haud. in prax. crim. c. 129. rubr. de Concuss. n. 1. Nobis tamen magis aridet opinio Farinac. qu. cr. iii. art. 3. n. 49. verius scilicet esse, quod crimine Concussionis non teneatur Judex, quando à spontè dante & corrumpente, nulla præcedente illatione metus, aliquid recipit, nec justitiam facit, sed tantum eo casu, quando aut indebitè vexando, pecuniam extorquet, aut concutiendo metum pecuniâ a subditis exigit, vel ut Paris de Puteo de Synd. c. 7. dicit, quando Judex minatur de incarcerando vel gravando, nisi quis pecuniam dederit. Potest ergo quis non facere justitiam, & pati se corrumpi, etsi non committat concussionem, & vel minis vel persuasionibus terreat vel inducat ad sibi dandum munera aut pro justitia facienda pecuniam. Theodor. coll. crim. cap. 9.

TH. VI.

DEFINITIO.

Hiscæ præmissis in posteriori significatione describimus Crimen Concussionis, quod sit **EXTORSIO ALIENI, METU POTESTATIS VEL SUÆ VEL ALIENÆ. L. i. ff. de concuss. Donell. lib. 15. cap. 39. lit. A. & B.** Loco generis ponimus **EXTORSIONEM**, sub qua voce etiam continetur crimen huic simile, quod vocatur Superexactionis, quod committitur ab Exactoribus, qui ultra debitum quod eliciunt, qua de re *l. un. c. de superexact.* Dicitur Extorsio ratione Concussoris quod hic concussio terrorem injiciat pecuniæ vel alterius Rei accipiendæ causâ. *Farinac. qu. crim. iii. art. 3.* Interim cum Extorsio sæpè absq; metu fiat, Concussio vero metû præsupponat, merito additur vox **METU**, qui describitur, quod sit instantis vel futuri periculi causâ mentis trepidatio *l. i. ff. quod. met. caus. gest.* Is incutitur

cutitur vel facto vel verbis, *Decian. in tract. crim. lib. 8. c. 35.* absit tamen, ut hoc loco intelligamus atrocem metum, periculum mortis, cruciatusve aut quid simile continentem, qui ad concussionem non refertur, sed potius eam à vi & deprædatione distinguit. *l. un. c. ex delict. Def. in quant. hered. conv. l. 6. §. 5. de mod. mult. quæ à Judic. infl.* est ergò metus ille minor & mollior, cum magis assiduitate quatiendi, quam impetu extorqueatur. *Donell. loc. alleg.* quatenus oritur à Potestate, tanquam SUA, utpote si Magistratus illicitè quid imperat. *l. 6. §. 3. ff. de Offic. Pres.* si licita negotiatione prohibeat. *l. 6. §. 4. ff. ibid.* si metator imperet hospitium pro iis, qui in numero officiorum vel militum non sunt, vel si imperet immunibus. *l. 6. §. 3. & 6. ff. ibid.* prohibitionis ratio §. 5. subjicitur, Netenuis vitæ homines prætextu adventus officiorum vel militum lumine unico vel brevi suppellectili ad aliorum usus translatis injuria vexentur. Item si centurio injungat militi, quæ tyroni conveniunt. *l. 3. c. de cond. ob turp. caus.* vel ALIENA, si privatus, simulato Magistratus jussu quid auferat. *l. 1. ff. de Concuss.* si crimen & accusationem minatus. *l. 2. ff. eod.*

TH. VII.

Ratione personarum Crimen Concussionis committentium, de quibus in sequenti capite latius agetur, dividitur in publicum & privatum, hoc intelligitur, cum Concussio à privato commissæ sit. *l. 1. & l. 2. ff. de Concuss.* si verò à Magistratu & Officiali perpetretur, publicum crimen est, admixtum privato, atque ita unico delicto, unico facto, duo crimina admixta esse putemus, privati

DISTIO.

B

scilicet

scilicet, quatenus Concussionis nomen retinet, publicum, quatenus Reperundarum sanctionem respicit, *uti probat l. jubemus cum sequenti c. ad l. Jul. Repetund.* sic & in aliis permultis privatum cum publico crimine concurrere contingit, ac nonnunquam duplex publicum *l. interdum ff. de publ. judic. l. Prator. §. 1. ff. de Minor. l. Prator. §. 1. ff. vi bonor. rapt. l. 3. ff. de prævar.* quatenus publicum dicitur, incidit in crimen Reperundarum, & Judex per Concussionem corruptus, eadem Lege Julia de Repetundis punitur *dict. l. jubemus.* ita tamen ut nec ideo appellatio Concussionis & criminis Reperundarum confundatur *Hillig. sub lit. D. ad Donell. lib. 15. cap. 39.* nam Magistratus vel alius, qui in officio publico est, si à privatis sordide pecunias accipiat *t. t. ff. & Cod. ad L. Jul. de Repet.* tum hoc fit dupliciter, aut Magistratus pro publica potestate ab invito aliquid prætextu juris alicujus extorquet *l. 1. 2. 4. verbo concussus. 5. verbo concussum c. de L. Jul. Repet.* quod per concussionem fieri dicitur, *Menoch. cas. 342. n. 12.* si vero Magistratus aut Judex vel horum minister, quo magis aut minus quid ex officio suo faceret, à volente commodum aliquod percipit *l. 1. 3. 4. 6. 7. 8. & 9. ff. de L. Jul. Repet. l. 3. 4. verb. si quis scit & l. ult. c. eodem. Novell. 8. c. 1. & 7.* veluti objudicandum decernendum vel *l. 3. ff. de L. Jul. Repet.* ob testimonium denunciandum *l. 6. in pr. de L. Jul. Repet. &c.* nomen Barratarie seu criminis Reperundarum habet, haud posterior, sed prior species, nempe quatenus Magistratus pro publica potestate à subditis invitis aliquid extorquet, scopo nostro est accommodatissima, quam absq; ulteriori verborum anfractu speciatius excussum imus.



CAP. II.

EXHIBENS SPECIALIA.

De Personis committentibus, & quibus modis committatur hoc Crimen Concussionis.

THES. I.

Generalioribus præmissis ad specialiora & quidem ad personas committentes hoc crimen, atque ad modos committendi progredimur. Et quidem quod ad Personas attinet, crimen hoc committi tam à personis Officialibus, quam à privatis nullum Officium habentibus, sicuti capite præcedente demonstratum, haud dubium est, quanquam inter quosdam Doctores magna fuerit disceptatio, an etiam hoc Crimen à privata persona nullum officium habente admitti possit? inter quos *Ricc. coll. dec. 2545.* ubi dicit, post longam discussionem, communi voto demum pronunciatum esse, hoc extorsionis crimen non posse considerari in persona privata, sed in habente jurisdictionem & sic in officialibus solum, contrarium vero probatur *ex l. 1. ff. de Concuss. Farinac. qu. cr. III. n. 46. & cum hoc Dd. comm.*

TH. II.

Personis privatis annumerantur Advocati, Medici, Patres & omnes alii, extra officium publicum constituti, qui metu vel minis, tacite vel expresse aliquid extorquent. Per Officiales vero intelliguntur omnes Magistratus, tam temporarii, quam perpetui, tam urbani quam Provinciales, tam Majores quam Minores, & qui

potestate, officio, munere, ministerioque publico funguntur, uti erant Comites Præsidum, eorumque ministri *l. 1. C. ad Leg. Jul. Repet.* Assessores *l. 3. c. de Assess. Cognitiones l. 3. C. ibid.* & si qui alii. Sed per Magistratus & Officiales in nostra dissertatione hodiernos Provinciales Magistratus, vulgò *die Beaumpte* intelligimus, quorum causa etiam *lex. Jul. Repet.* lata est.

TH. III.

Nunc perveniendum ad modos, quibus perpetratur hoc crimen concussionis, hi vero sunt multifarii, & præsens tractatio nimis excresceret, si omnia horum momenta explicare vellemus, interim delibabimus tantum nonnullas species, & quidem quoad personas privatas committitur hoc crimen Concussionis.

TH. IV.

(1.) Inter Advocatū & Clientem contractus prohibitos esse tradit *l. 6. §. 2. C. de post.* & hic *Brunn. in comment.* quia ejusmodi pactio fieri posset in fraudem juris de quota litis, ac quidvis extorquendi à Cliente ansa daretur: *Donell. l. 18. cap. 3. lit. ddd. & ibi Hilliger.* Et quamvis pactum inter Clientem & Advocatum super quota litis initum non subsistat propter metum iniquæ extorsionis, nemo tamen statuet, quin quivis contractus alii cum Advocato iniri queant. Sic proinde statuendum arbitramur emtionem venditionem inter Advocatum & Clientem esse licitam, nulloque jure aut ratione prohibitam.

TH. V.

In crimen Concussionis vero (2.) incidere eum putamus, qui longi processus metu incusso, alicui portionem



nem hereditatis vel simile aliquid, jure alias sibi minime debitum, extorsit.

TH. VI.

Eandem ob causam (3.) Medicus & Ægrotus iis personis, inter quas contractus non valet, annumerari solent, per *l. 51. Medicus 3. de extr. cognit.* Ubi Ulpianus his verbis proficitur. Si Medicus, cui curandos suos oculos, qui eis laborabat, commiserat, periculum amittendorum eorum per adversa medicamenta inferendo, compulit, ut sibi possessiones suas contra fidem bonam æger venderet, incivile factum Præses Provinciæ coerceat, remque restitui jubeat, & in *l. 9. C. de Professoribus & Medicis.* Etenim cur ægrotus cum Medico pacisci nequeat, ratio alia dari non potest, quam quod ægrotus spe recuperandæ pristinæ sanitatis, quidvis etiam iniquissimum polliciturus esset contra libertatem patientis, & sic fortassis iniquis extorsionibus à legibus improbatis occasio præberetur, deinde quia ægrotus metueret, ni assentiretur Medico, moremque gereret, & postulanti iniquum etiam salarium promitteret, vel rem viliori pretio venderet, medicus malis uteretur pharmacis, nec tam citò sanitati eum restitueret. Hoc tamen tantum intelligendum de eo casu *in d. l. 3. de extr. cognit.* si contra bonam fidem adversa medicamenta inferendo, compulit Medicus ægrotum ut venderet, post recuperatam vero sanitatem, Medicus non tantum donationes & honoraria ab ægroto licitè accipere potest, sed jure etiam exigit. *Trent. in disput. ad jus. civil. 2. part. 1. vol. 2.*

TH. VII.

Concussionis crimen apparet (4.) in Calumniatoribus,

bus, qui in accusationem innocentum coierint, quive ob accusandum vel non accusandum, denunciandum vel non denunciandum testimonium, pecuniam acceperunt, sunt verba l. 2. ff. de Concuss. item. l. 1. §. 3. ff. de calumn.

TH. VIII.

In Matrimonialibus (5.) parentes & omnes alii, sub quorum potestate contrahentes, rei hujus criminis Concussionis fiunt, si commodi causa filiam vel filium ad hanc vel illam personam matrimonio sibi jungenda metu & minis cogunt, quippè tale factum l. 21. 22. & 28. ff. de ritu nuptiar. l. 12. & l. 14 C. eodem expressè prohibitum est. Struv. in jurispr. lib. 1. tit. de sponsal. aph. 2. Nam in sponsalibus tam eorum qui junguntur. l. sponsalia 11. ff. de sponsal. l. si puella 6. l. filiosam. 13. alleg. tit. quam quorum sunt in potestate, consensus requiritur. l. si in sponsal. 7. l. sed ea 12. ff. de sponsal. & spondeo à spontè venit, undè spondeo fit quasi spontè do vel promitto, cum omnino libera esse matrimonia debeant. c. cum locum. 14. c. gemma. 39. Ext. de sponsal. Wesenb. in paratit. lib. 23. tit. 1. de sponsal. Et consensus est actus liberæ voluntatis, à sano & integro Judicio profectus, sic è contrario Metus & Terror, quæ quàm maximè voluntati & consensui sunt inimica l. 116. ff. de Reg. Jur. unum enim conservat & sustinet, alterum destruit, ab hoc negotio exulare debent. Dn. Pet. Mullerus in egregio tr. de annulo pronubo. tit. 12. n. 1. & 3.

TH. IX.

Crimen hoc (6.) perpetratur inter virum & uxorem in contractu mutui, si e.g. vir uxorem ad intercedendū

sive obligandum & subscribendum pro se minis vel verbis compellit, quod tamen de jure maximè prohibitur, tam auctoritate legis, *per Novell. 134. c. 8. indeque desumptam auct. si qua mulier C. ad Sc. Vellej.* verum etià quod fidejussioni contrarietur debitoris dolus, vis & metus; Cum enim debitoris & fidejussoris consensu fidejussio cum creditore per stipulationē contrahatur, certè dolus vis & metus abesse debent *l. 3. l. 5. C. de inut. stipulat. leg. nihil consensui ff. de R. J. l. si donationis C. de his qui metus causa.* Sed quid si in eodem Instrumento reperiatur hæc clausula, non vi, dolo aut metu, sed sponte freyes ungezwungenen Willsens, quæritur, utrum ex hac clausula probetur libera ac spontanea voluntas, metusque excludatur, maximè accedente juramento? Observandum tamen est, hanc clausulam non tanti esse momenti, quin contractus vires suas perdat. Primo ob id, quod ista clausula ut plurimum ex consuetudine Notariorum apponatur, ideoque parum operetur, ex doctrina *Bartol. in l. 1. qu. 6. ff. de jure cod.* Deindè etiam hæc ipsa clausula operatur tantum in dubio, quando de metu non constat, sed quando metus verè justificatur, nullius est efficaciam, quoniam eodem metu quo quis inducitur ad contrahendum, eodem inducitur ad sic confirmandum. Undè qua ratione non tenet contractus metu gestus, eadem quoque ratione clausula illæ accessoriam, adjici consuetæ, eodem vitio laborant. *Hering. in tr. de fidejuss. c. 19. §. 15 Menoch. de presl. l. 3. presl. 126. n. 30.*

TH. X. 1010. 2215. 17. 1111
 A Crimine Concussionis non est alienum (7.) si personæ militares per vim aut metum aliquem ad militiam cogant,

cogant, (quamvis ferè ad Concussionis publicum crimen pertineat) & deinde accepta pecuniæ summa, ac substituto novo tyrone mittunt, vel si Capitaneus extorqueat pecuniam ab habente causariam missionem, utrumque factum quotidie obtingere quotidiana experientia docet. Interim quod quis dedit ob causariam missionem ne cogatur militare, id potest repetere per conditionem ob turpem causam, & si is cui est datum, sit in officio, punitur ut Concussor pœna criminali, quod intelligendum de eo, qui ad militiam est inhabilis, vel alias jure excusatus. Nam si cogeretur ad militiam, contra deberet vacare jure vel alia causa, & aliquid dederit Officiali pro redemptione vacationis, illud non daretur turpiter, turpiter autem acciperetur ab Officiali, ergo daretur repetitio danti. Exemplum potest poni in eo, qui missionem honestam i. e. sacramento solutus vel causariam propter aliquem morbum animi vel corporis impetrasset. Nam tres sunt missionum species *sec. l. milites agr. §. mission. ff. de re milit.* Nempè honesta, causaria & ignominiosa, & hæc actio ob turpem causam est civilis, Judex autem cum illa actione cognoscit eum, qui acceperat fuisse Officiale, & sic crimen Concussionis admisisse, finito primo Judicio punit illū Officiale propter crimen Concussionis, quia à publica persona perpetratum. *Siehard. in Cod. tit. 7. lib. 4. ad l. evitandi.*

TH. XI.

Inter species Concussionis (8.) quoque numerari potest. Si latro in locis remotis à quopiam sub comminatione mortis, non solum promissionem juratam, magnæ



magnæ pecuniæ summæ, verum etiam ejus numeratio-
nem certo loco & tempore extorqueat. Sed quæstio hic
oritur, an tale juramentum per vim & metum extortū
sit servandum? Super qua quæstione inter Theologos
& politicos non est una omnium mens, secundum jus
Civile Legistæ communiter tenent, tale juramentum
ipso jure nullum esse, in *Auth. sacramenta puberum C.*
si advers. Vendit. eorum rationes hæ sunt (1) quod nem-
pè Juramentum non debeat esse vinculum iniquitatis.
text. in C. quanto de jurej. in cap. inter cetera 22. qu. 4.
sed justitia suffultum, & requirantur tres comites, ju-
diciū nempè, justitia & veritas. *can. 2. xxii. quæst. 2. de*
jurej. it. cap. etsi Christus, 26. Ext. de jurej. Cum igitur
latrones saltem ad colorandam & confirmandam ini-
quitatem suam adhibuerint jusjurandum, ob defectum
trium istorum requisitorum, hoc ipsis prodesse vinculū
non debere. (2) quod Latro non habeat jus exigendi,
cum etiam in conscientia obligetur, reddere quod acce-
perit. (3) non metuendum esse in Latrone, ne negli-
gendo fidem juramenti, profanetur apud ipsum nomen
Dei, cum malitiosus existat nominis & nūminis divini
contemptor. (4) si Latro nobis aliquid deberet, ob ma-
litiā cui indulget, non servaret promissum. Jam
frangenti fidem, fides frangatur eidem, & quæ sunt alia
argumenta. Sed nos cum Doctoribus Theologiæ
statuimus, fidem juratam etiam Latroni datam, sanctè
nihilominus servandam, & quidem ex hisce rationibus,
nempè omne juramentum, quod absque dispendio sa-
lutis æternæ servari possit, servari debere *cap. 8. Ext.*
de jurejur. & illud, quod sibi vult promitti latro, aut

falva conscientia promissor præstare potest, aut non potest. Si potest, peccat utique qui promissa non præstat, præsertim si deliberato animo & jurato fuerit promissum; si non potest e.g. occidere summum Imperantem, deferere veram religionem; prius omnia perferre debet, quam tale quid promittere, abusus enim Nominis Divini est ab omnibus piis sedulo vitandus, si quis ita promittat latroni, Deus sit testis atque vindex, quod hoc vel illud tibi præstare velim, & tamen eo momento quo sic jurat, in animo habeat, ego à periculo liberatus, hoc non præstabo, quia latro est cui jurat. Si generaliter verum esset, quod quis per vim adactus, latroni non obligaretur, etsi aliquoties fides data non servaretur, latronesque resciscerent juramentum ipsis præstitum statui tanquam non obligans, tunc nulla superesset ratio, qua se miseri expedirent è manibus latronum, sed potius perire deberent, quo ipso profecto non consuleretur Reip. Melius autem prospicitur, si statuitur medium conservandi homines Reipubl. sæpè utilissimos. Licet injuriam nobis dum cogimur inferant latrones, & sic in conscientia obligentur, ad damnum injuria datum nobis reparandum, si tamen ipsis quæ talibus promissimus, omnis censetur remissa exceptio, quam contra ipsos quæ tales habemus. *Prückner in disert. pro loco, de promissione per vim extorta cap. 1. §. 6.*

TH. XII.

Juri NATURÆ quoque contrariatur hoc Crimen, nam jure Naturæ constat, unumquemque de re sua pro lubitu & arbitrio disponere, eamque in alium sub honesta conditione, sive fortuita ea sit, sive ex industria pen-

pendeat, validè transferre, neque eo citra injuriam prohiberi posse. *l. 2. ff. si a parente quis manum. l. 9. C. de judic. l. 21. C. Mandat.* Inest enim hoc in Dominii pleni scilicet natura. *Grotius de J. B. & P. lib. 2. cap. 6. §. 2. & ejusmodi lib. cap. xi. §. 1. addatur m. d. tunc dat. Puffend. de J. N. & G. lib. 4. cap. 9. §. 1.* ut adeo rectè proprietatem definierit Philosophus, qua penes nos est jus alienandi. *Dn. Sigfrid. Heuning. Oldekop. Jctus famigeratissimus & Patronus meus de venerandus in erudita sua disputatione inaugurali de Sponsonibus. §. 2.*

TH. XIII.

Non committitur vero Concussio jure Gentium circa bella, nec quod jure belli obtentum est repeti potest. *vid. Grot. lib. 2. cap. 17. §. 19.* Gentium enim consensu introductum est, ut bella omnia potestatis auctoritate utrinque gesta pro justis habeantur, quoad effectus externos. *add. cap. 24. §. 13. n. ult. & lib. 3. c. 3. passim.* *vid.* omnino Politica curiosa. *Membr. 3. §. 26. pag. 208. seq.* adeoque injustè Carolo V. concussionem objecit, Fanciscus I. R. G. cum ad promissa servanda adigeretur. *vid. Histoire de l'Empereur Charles V. par Don Jean Antoine de Vera, traduit d'Espagnol en Francois &c. pag. 144. seq. add. Bodin. de Rep. lib. 5. cap. 6. pag. 930. seqq.*

TH. XIV.

Sed in foro FEUDALI hoc crimen occurrit, si nempe Reges vel Principes de imperio dejecti, & novi Domini Vasallos cogant, ut in territoriis illis fidelitatem aut subjectionem promittant, undè quæstio moveri potest, num per id factum Vasalli censeantur Feloniam committere contra priores Dominos? Hæc, quæstio

tunc potissimum ventilatur, si priores Domini aut per vim Martis aut per pactiones recuperent Imperium, & arbitramur, posse Vasallos & subditos, si cogantur etiam Tyrannis & injustis in vasoribus, quos sciunt esse tales, postquam ex pulsi sunt legitimi Domini, juramentum præstare fidelitatis vel subjectionis, cum cessat potestas protegendæ, haud tamen per hoc illos obligari, ut contra legitimum Imperantem adsistant injustis in vasoribus. Et licet formulæ juramenti ita concipiatur, quod in vasoribus contra omnes hostes auxilium debeant ferri, nihilominus ejusmodi juramentum præstari potest, cum intelligantur omnes hostes, quibus salva conscientia resistere vel vim inferre possumus. Non debent autem legitimi Domini tyrannis ejectis, ipsi mutari in Tyrannos, ut subditos, qui se intra justitiæ terminos continuere, durius tractare velint, propter fidem Tyrannis ex justo metu præstitam. *Sebrad. de feud. part. 9. cap. 5. n. 31.* ubi deducit, quod Vasallus, qui justo metu ductus amicitiam cum Domini inimicis copulavit feudo privari non mereatur. *allegans Matth. de Afflictis cap. 1. §. item si fidelis. n. 55. quib. mod. feud. amitt. Hyppol. de Marfill. l. 1. §. propterea n. 10. ff. de quest.* Neque Vasallus culpam sustinet, qui maximo metu compellitur, feudo alioquin privandus, ni potentiori extraneo minas fundenti, & hactenus exequi solito, morem gerat. Nec uni Vasallo fraudi esse debet, si alius ex desperata resistantia maluerit feudum perdere, quam extraneum agnoscere Dominum, absurdum enim foret, pro crimine accipere, cum quis aliquid facere neglexerit, quod alius in pari conditione constitutus,

ex

ex nulla obligatione, sed ex superabundanti peragit. Sufficit, si Vassallus, ea observavit, ad quæ ex natura Feudi & per juramentum obstringebatur. Semper quoque erga alios, qui justo metu compulsi egerunt, Christiana utamur commiseratione, Salvatoris nostri motum probe considerantes. Quod vobis fieri vultis, aliis quoque faciatis. Videtur hic quodammodo referri posse controversiam motam inter Electorem Brandenburg. Frideric. Wilhelm. gloriosissimæ memoriæ, & Regem Poloniæ Casimirum, qui propterea, quod Elector Svecis auxilium tulisset, ad pacem Polonis damnosam accelerasset, partem Borussiae feudali nexu involutam, adimere non erubuit. *Thulden. contra Brachell. l. 6. p. 232. it. l. 8. pag. 173.*

TH. XV.

Jure CANONICO quoque committitur hoc crimen, si e.g. in Electione personarum Ecclesiasticarum speciatim aliquid detur, ne electioni vel postulationi resistatur. *vid. Hoersold. de act. act. 7. part. pand. act. 45. pag. 674. add. Job. Christoph. Gwinzius tr. de Simonia.* Unde laudabile est institutum, quo utitur Ducatus Cellesis Consistorium, dum juramentum à Candidatis officii sacerdotalis exigant, quod spe impetrandi officii nulla munera obtulerint, quo pacto Simoniæ crimen & suspicio avertitur. Porro hoc crimen extorsionis etiam obtingit in Patronis Ecclesiæ, sequenti modo, quando Promotores Candidatis certas condiciones præscribunt, ut porè ipsis matrimonia, quæ aliquando non leve fraudis præjudicium comitantur, obtrudunt, ut adeo jura eorum circa præsentationem non immerito restrin-

stringenda fordeant. *Relferdso. de summa Principum Germanie potestate. cap. 1. p. 75. seq.* Huc refer *Balduin. de casib. conscient. l. 4. c. 5. cas. 12.* Undè quæritur, an valeat consuetudo, quæ in quibusdam locis, ut in Pomerania, Marchia aliisque locis recepta & introducta, ut defunctorum parochorum sive pastorum viduæ vel filiæ relictæ, in parochiis maneat, & à successoribus in uxores ducantur, quod affirmamus, eamque sententiam multis rationibus eleganter defendit. *Spekhan. in qu. juris. cent. 3. clas. 1. qu. 5.* quam honestissimam & omnijuri & æquitati convenientissimam vocat, hoc tamen cum additamento, ut in successoris arbitrio positum sit, velitne an nolit, vacantem in Parochia locum ambire, & relictam antecessoris viduam vel filiam in uxorem ducere, vel alium locum, vidua vel filia vacantem expectare. Ita similiter in libero viduarum vel filiarum arbitrio positum sit, utrum viro parochiam ambienti, nubere, an vero Parochiam potius deserere malint. Ut ita à neutra parte ulla hic interveniat coactio, sed utrimque liberum sit arbitrium, libera voluntas, libera electio, liberrimus consensus. *Confer. Zigler. in dicastice. concl. 8. passim & in specie Balduin. de cas. conscient. lib. 4. cap. 5. c. 9. Finkelth. de jure patron. cap. 7. n. 38. it. politica curiosa membr. 3. §. 32. pag. 255. & seq. qui Spekhanii defensionem laudat.*

TH. XVI.

In Jus PUBLICUM procidit hoc Crimen, dum Princeps summus per injustitiam & injuriam subditorum bona sibi addicit, cujus Rei manifestum exemplum elucet in Achabo. *Reg. 21.* qui videns Nabothum nec fistu-



fistulæ dulcè canentis autoritate, nec minis levioribus quas absque dubio adjunxisse videbatur moveri posse, id ipsum homicidio cumulavit. Sed Principi non competit proprietas bonorum subditorum ita, ut iisdem pro lubitu citra bonum publicum uti vel abuti possit, neque vis Dominii eminentis ad hoc extenditur, de qua materia *vid. Lyserum tr. de eminente Dominio. add. Vitriar. inst. jur. publ. l. 3. tit. 13. §. 140. & seq. it. Bocler. ad Grot. lib. 1. cap. 1. pag. 113. seq. Politica curiosa membr. 3. §. 45. 49.* ubi etiam speciatim de Nabotho ait, *it. Philipp. Melancthon. in corpore Doctr. Christ. pag. 837.* cum hoc ipsum abhorrere videtur à prima Reipubl. institutæ ratione, cum Imperia non Regnantium sed parentium bono parata sint. *vid. Samuel. Puffendorf differt. Acad. select. de concord. polit. cum Relig. Christ. §. 4. p. 432. seq.*

TH. XVII.

Inter privatas personas diffidatio est haud infrequens, quæ licet cum crimine Concussionis affinitatem habere videatur, attamen majoris distinctionis causa describimus, quod diffidatio *dte Befehdung oder Absagung* sit hostilis illa minatio, qua inimico per literas, signum; aliudve factum extremæ vitæ, sanguinis aut bonorum persecutio denunciatur &c. Unde dicuntur literæ diffidatoriæ *Absage-Schreiben/ Fehde-Briefe*. Differunt ergo à literis minatoriis seu minantibus, quod illæ sint minæ qualificatæ, & diffidationem proximè sequatur vis publica, quippè hæc per illam annunciat, eo enim ipso, dum publicè indicat, se diffidandum armis, igne, spoliis, cædibus, rapinis &c. persecuturum serio declarat, diffidandum à diffidatore nihil aliud quam vim publi-

publicam expectare debere Minantia verba simplicia non sunt diffidatoria, neque vim publicam subsecuturam continent. Quam differentiam tamen ratione atrocitatis, quam infecuturæ pœnæ, & simul si verba sunt dubia, numpro diffidatoriis, num minatoriis sint habenda, quid dicendum optimè colligere licet, ex placitis Jctorum Saxoniorum. Videatur Dn. Petrus Müller. in dissert. de verb. minant. cap. 1. th. 5. Hahn. in ff. ad tit. de concuss. qua occasione notari meretur, injustus modus acquirendi Heroum Academicorum, vulgò der Schläger vel Renomisten, qui injecto diffidationis timore, commilitonibus pecuniam vel directè, vel indirectis compotationibus largioribus extorquent, quæ vita tamen Academica hæc & similibus modis malè antea facta, haud leviter consideranda, præsertim candidatis Theologiæ. vid. Brunn. Jur. Eccles. lib. 1. cap. 4. §. 10. ad quem propterea locum remittit. Dn. Stryk. vol. 3. diss. jurid. 4. de Vita antea facta. c. 3. n. 23. talis vero detestabilis modus in quibusdam Academiis & locis per Edicta publica est abrogatus, uti constat ex laudabili Edicto contra Duella Serenissimi Electoris Brandenburgici, de Anno 1688. ubi per totum omnes diffidationes, minitationes & duella sub comminatione certarum gravissimarum pœnarum seriò vetat, addatur Edictum hic Hannoveræ à Serenissimo ac Potentissimo Electore Brunswicensi, Domino meo Clementissimo, ut & in præterlapso Anno Edictum Jenæ contra Duella publicatum. Huc etiam non incommode transferri possunt, literæ illæ, quibus incertis nominibus incendia ad extorquendam pecuniam denunciant,



ciant, vulgò Brand-Briefe, *vid. Haersold. Advers. de act. act.* 19. n. 2. Sed è diverticulo revertor in viam, ad Officiales, & quibus modis hi committant hoc Crimen, nam de hisce differendi noster maximus est scopus.

TH. XVIII.

Antequam tamen nos pelago de Officialium concussionibus enumerandi committamus, præmittimus, quod Officialis nomen ab Officio quod obeunt Officiales, derivationem acceperit, & in nostra dissertatione per Officiale Præfectum vulgò cinen *Beaupten / Amptmann* intelligamus, hic si legitimus debeat esse, pius ante omnia sit, necesse est. Enim vero uti Præfectorum opera æquè ac aliorum Officialium in administranda Republ. Principi oppido necessaria sunt, ita, talis quoque eligendus, qui officio, cui præficitur, sufficiat, ut nihil damni ex administratione sua in republ. redundare possit.

TH. XIX.

Huic pietati adjungenda venit vitæ probitas, hæc enim ante omnia spectanda, *per l. sancimus 6. C. ad leg. Jul. repet.* adeoque sit modestus, temperans, ac prudens; Quo ipso excluditur omnis mali mater avaritia, quippè quæ probitatem omnem, cæterasque artes penitus subvertit. Hinc exiguo vel nullo mactandus est honore, qui dum nullis meritis vel virtutibus conspicuus, & sola pecunia fretus, se Officio ingerit, qui merito suspectus censendus *l. 25. ff. de procurat. l. 21. §. fin. ff. de tut. & curat. dat.* plerumque etiam imperiti se plurimum ingerunt, imperitiâ excitante confidentiam ex Imperitorum scilicet attrito, quod peritorum mollis & imbecilla frons sit.

TH. XX.

Maximè vero omnium suspecti sunt, eaque propter
 cane pejus fugiendi, qui ad ejusmodi officia ære onusti
 grassantur. Ut enim nihil dicam, virtuti viam omnem
 ad honoris culmen præcludi. Ipsa certè Respubl. & in
 ea præfracturæ nundinationi ejusmodi exponuntur.
 Necesse sanè est censente Alexandro Severo Imperato-
 re: ut qui emit, vendat. Hinc generosa voce idem
 dixit. Non patiar mercatores potestatum, quos si pa-
 tiar damnare non possum. Erubesco enim punire il-
 lum hominem, qui emit & vendit. Quasi dicturus esset:
 si emere licet Magistratus, utique enim licebit vendere.
 Quapropter optimè factum ab illis Imperatoribus, qui
 turpissimam munerum emtionem severissimis pœnis
 represserunt. *l. fin. C. ad leg. Jul. repet. & Nov. 8. Dn.*
Petr. Müller. in dissert. de libris Officialium, cap. 2. §. 2. 3.
 Undè Officiales non debent eligi ambitione & pretio,
 sed probatæ fidei testimonio. *Confer. Exod. c. 18. v. 21.*
 Et hi debent jurare, se pro Officio acquirendo nihil
 dedisse neque promississe, nec per se nec per alium quo-
 cunque titulo, ut præter salarium à nemine, quicquam
 durante Officio, vel deposito pro eo quod gratis præ-
 stare debent, acceptaturos. Et Dorophagiæ resistitur,
 si efficiatur, ne officia sua ipsi quasi emant, daß sie nicht
 mehr zu Erlangunge ihrer Dienste versalben/ als ihnen
 solche etliche Jahre ertragen mögen. Ementes enim
 Officia animum habere præsumuntur, non autem Ze-
 lum Justitiam administrandi *l. 2. C. de murileg. Linden-*
spur in comment. über die Württembergische Landes-
Ordnunge.

TH. XXI.

Ideoque omnis Magistratum & Officiorum nundinatio prohibita *per leg. fin. C. ad leg. Jul. Repet. Nov. 8. pr. & §. 1.* & Principi est indecorum vendere officia, quia tunc dicitur mercari sacratissimum mysterium iustitiæ, pretii venalitate. *Matth. de Afflict. lib. in Constit. Neapol. rubr. 93. n. 5.* Nihilque pejus est, quam si quibusdam aureis Officiarii redimant Officia, & jurisdictionis potestatem à Principe, quia infinitas revendendi carius iustitiam subditis occasiones, architectantur, & lites protelantur, ut impudenter audeant in subditos grassari, palamque supra sportulas debitas petere, quod Principi pro mercatura officiorum, se præbuisse dicunt. Unde rebellionis & alià infinita absurda. Wenn ein Herr einen Hauptmann das Einkommen um ein gewisses ammodiret; *Winther. in parthen. litigios. lib. 1. c. 12. n. 15.* Talis enim Officialis est sicut catus qui ponitur ad custodiendum caseum, ne mures illum rodant. Sed si catus semel apponat dentes, plus nocebit uno morsu, quam mures viginti. Ratio hujus injustitiæ est, quia ex hujusmodi locatione & mercatura maxima Reip. inferuntur damna, & via ad injustitiam & iniquitatem aperitur. Iniquitas enim est litium causa, sicut æquitas è contra legis anima, sine qua cadaver est corpus Juris. Unde Margaritha Austriaca Mantuæ Ducissa sapienter dixit: *Che i testi è paragrafi non erano bastanti per animare il governo politico; mache l'Equita era l'anima del la leggi. h. e. testes & paragraphos non sufficere ad animam gubernationis politicæ, sed æquitatem esse animam legum, quia nonnulli ex Judicibus magis*

eqvum coloratum, quam æqvum diphtongatum no-
seunt secundum illud.

Dixerat hic æqvum, sed tulit alter eqvum.

Winther. in Parth. litig. lib. 1. c. 1. 2. n. 16. Vix enim ille qui
munus munere emit, sine munere munere fungitur.
Sed corruptæ Reip. carcinoma est mercatio justitiæ.
Ubi licitatio pervicax virtutes agentium à Magistratu
excludit, ibi precium munerum furtivorum, patrimo-
nii ruinam reparèt, necesse est. *Mercur. Gal. tom. X. de*
Anno 1624. p. 687. de la venalité des Offices & du drojet
annuel, sicut hæc species ammodationis vocatur à
Gallis, & auth. anonim. von jährlichen Einkommen
Frankreichs. Nihilominus tamen odiosa illa venden-
di publica officia ratio, moribus invaluit Gallorum;
testante Virò Illustri, Jacobo Augusto Thüano, rerum
Gallicarum scriptore. l. 132. atque eadem in Regno Gal-
lico hætenus viridi floruit observantia, *memorante*
Limæo. Notit. Reg. Franc. l. 21. cap. 9. Georg. Horn. in
Orbe Polit. p. 1. tit. de Reg. Gallie. cap. 6. Quid nostris &
aliis regionibus hoc circa punctum in usu sit, quotidi-
ana loquitur experientia.

TH. XXII.

Interim hic quæstio occurrit: An indigenæ potius
quam exteri muneribus Officialium præferendi sunt?
Quæ quæstio pro cujusque temporis Regimine, Regio-
nisque consuetudine agitur. Quod jus Civile & Ro-
manorum historias moresque concernit, non unifor-
mem deprehendes dispositionem. Enim vero *in l. 3. ff.*
de Offic. Asses. cautum est, ne Officialis sit de eadem
provincia & loco, ubi administrandum est officium.

Quod



Quod autem à Romanis propter nimium popularium & provincialium suorum affectum propter cognationes & necessitudines arctiores nec inde iudicia corrumpere, inductum esse videtur. Sed contrarium ab omnibus ferè gentibus est receptum, idque ob gravissimas causas, nempe quoniam ex electione exterorum facile oriuntur similitudines, & ex indignatione mox turbæ civium sint metuendæ, siquidem conquerruntur populares, rem valde esse præjudicalem, inquit Gentis propriæ contemptum cedere, si exteris quærat Officialis. Quasi ita Noverca sit patria, ut neminem foveat tam excellenti præditum virtute, qui dignus haberi possit tali Officio. Proinde quæstus, livor & divulsio animorum. *Conf. Lips. in polit. lib. 3. cap. 4. ibique in notis.* E. contrario incolæ spe promotionis futuræ lactati filios studiis liberalibus imbui, sumptibus non parcendo curant, maximè, cum ipsi suo labore decimas ex quibus fiunt beneficia ac annua tributa, ex quibus præstantur salaria solvant. Deinde quoniam indigenis populi mores, patriæ leges & instituta, inter quæ educantur, omnium optimè cognita sunt, vel saltem melius noscere præsumuntur, quam alienigenæ *per l. 2. C. quem adm. Testam. aper. l. Sifundus 6. ff. de Evict. cap. quosdam Ext. de præsumt. Mynsing. cent. 4. obs. 30.* Item magis coalescunt animi, interiorque intercedit amicitia cum illis, qui sub eodem cælo nati educatique sunt. Facile autem disjunguntur, quos cælum & educatio disjungit, siquidem naturalis causa maiorem virtutem & effectum habet, quam accidentalis. Quale vix de extero quis sibi spondere habet. *arg. l. qui habebat. 29. ff. de*

ff. de Legat. l. Libertus. c. 7. §. sed eod. ff. ad Municipal. Speidel. in thes. jur. voce Land. Rinder / Seckendorff. in Fürsten Staat. part. 2. c. 5. §. 8. n. 3. propterea ex iis rationibus indigenis maximam præferentiam deberi censuimus.

TH. XXIII.

Accedit porro, quod etiam si in advenis talem peritiam peritizq; applicationem deprehendas, vix tamen sit, ut de illis tantum affectum, fidemque tantam cum amore sperare posses. Extra omne enim dubium est, eum affectum eamque fidem erga commune bonum indigenis cum exteris communem non esse, cum hi plerumque suo, non subditorum commodo velificentur, & tanquam in peregrino agro illud Comici in animo retinent. Mihi istic neque seritur neque metitur. *Hermann. Kirchner de Offic. Cancell. lib. 3. cap. 4. n. 29. Althus. in polit. c. 7. pag. 82. Aug. Barbosa ad cap. nullus invitis. 13. n. 11. distinct. 61. Quibus omnibus tandem addimus, quod sapius usu veniat, ut innoventur, aut potius commutentur ab istis avitæ consuetudines & ordinationes, imo Principes inducunt ad alia & plura onera subditis imponenda. Arum. discurs. jur. publ. 19. vol. 4. obs. 30. Myler. ab Erenbach. in Hyparcholog. c. 6. §. 7. n. 17. Quæ de causa indigenarum animi odiis & similitudinibus ut plurimum incenduntur. Quod vel ipsum observatum est à pluribus nationibus. Döppler. Von getreuen Rechnungs-Beampten / lib. 1. cap. 6. Quapropter etiam plerumque omnes gentes exteros ab officiis excludunt, iisdem interdiciunt omnem aditum ad officia publica & provinciarum interiora. Sic in Regno Poloniae peregrinis*



grinis nullus ad Regni officia aditus & accessus permittitur. *Becmann. parallel. polit. disp. 19.* Eandem apud Venetos obtinere testis est. *Francisc. Patric. de Instit. Reipubl. lib. 3. tit. 2.* Simile exemplum de Helvetis supeditat *Georg. Schönborn Polit. lib. 2. cap. 6.* Celebre quondam fuit præceptum Lycurgi, quo præcavere voluit, ne exterorum corrupti mores in cives suos vulgarentur. Et apud Sinenses, qui soli præ aliis populis sibi sapere videntur, constitutum, ne peregrini edocti vires Imperii occasionem regimen invadendi cape-
rent; id circo nec naufragium perpeffis, suos repetendi potestas est. Causam Gentium Europæ Aristoteles agit. *lib. 5. polit. cap. 3. ubi in comment. Philip. Scherb. inquit.* Seditiones ortas esse propter admissos peregrinos, ad jus civitatis & ad inhabitandum; qui ubi fortiores se esse arbitrati sunt, ipsos cives indigenos propriis locis voluerunt deturbare, aut peptulerunt aut turbaverunt. *Petr. Müller in diss. de Securitate metuentiu sect. 2. §. 8.* Quod etiam sancitū in nostro Electoratu & quidem in *Sandersheimischen Land-Tages Abscheid.* de Anno 1601. & verba hæc sunt. Zum Acht und dreissigsten; Wenn die Land-Kinder in Ehren und Tugenden auf Universitäten/ bey Hofe/ in ruhlichen Krieges-Zügen/ Haushaltungen/ und andern ehrbaren Handeln wol geübt/ und also qualificiret seyn/ daß sie mit Ruhm und Nutzen zugebrauchen/ auch S. F. G. treulich meynen/ daß alsdenn der gnädige Landes-Fürst Dieselbe so wol bey Hofe/ als uff dem Lande in Regierungs- und Krieges-Hoff und Haushaltungen/ Geistlichen und Weltlichen/ Geheimen und gemeinen Sachen/nach jedes Befindun-
ge



ge vor Fremdbden und Ausländischen so viel sich immer
füglich schicken wil/ zu hohen und niedrigen Nemptern
und Diensten zu befördern geneigt. Exotica enim aro-
mata & periculosa condimenta quaerenda non sunt,
quando domestici & paterni suppetunt cibi & fercula
salubria, ne stomachus hic à primo lacte nutritus, inde
morbum contrahat, & quod consequens est, cruda
omnia post evomat vehementer. *ad quod alludit. Job.*
Limneus. lib. 2. Jur. publ. cap. 2. n. 86.

TH. XXIV.

Hifce relictis ponimus hoc Crimen ab Officialibus in
subditos multifariam & quidem (1.) in Contractu, si
nempè hi ab illis mobilia vel immobilia emant, aliosq;
contractus celebrent, quales actus Officialium cum pro-
vincialibus jure Civili sunt planè prohibiti, ex ea ratio-
ne, ne subditi terrore Officialium in contrahendo indu-
cerentur, nec deterrerentur, uti constat *ex arg. l. 1. c. de*
contract. jud. cujus verba hæc sunt. *Provincias mode-*
rantibus non solum donationes, sed etiam emtiones quo-
rumcunque mobilium rerum &c. penitus interdiciamus;
Undè Officialis, qui hoc facit à crimine concussionis, &
impressionis excusari non potest, quia concussionem &
impressionem generatim inferre dicitur Officialis, &
porro *ext. licet 46. ff. de contrab. empt. vendit.* patet, quod
Officiali jurisdictionem habenti, non permissum sit bo-
na subditorum emere. *it. in l. principalibus 33. ff. de reb.*
cred. dicitur, quod hi qui provinciam regunt, quivè
circa eos sunt, negotiari non debeant, quam legem Dd.
extendunt ad omnes ferè contractus, ita, ut potestas
contrahendi cum quovis Provinciali sit ademta *Card.*

Tusch.



Tusch. lit. O. concl. 100. n. 3. 4. & 5. Unde, si Judex emat, vel alteri mutuo det, fit suspicio & timor impressionis, quia est terribilis partibus. *Struv. in add. ad diff. crim. X.* Suspiciones enim inter cogitationes sunt ut inter aves Vespertiones, nunquam volitant nisi luce crepera; Redimendæ certè sunt, aut saltem cautè custodiendæ. Mentem enim obnubilant, amicos alienant, & negotia interpellant, ita ut nec alacriter, nec constanter peragi possint. *Fr. Baconi de Verulamio in sermion. fidel. cap. 31.* *Cicero in Verrina sexta*, de dicta Emptione verò inquit, veteres putabant ereptionem esse, non emptionem, cum venditori arbitratu suo vendere non liceret, & quod quisque vellet, si vè venale esset, si vè non esset, auferret. Interim hic videndū, ne erremus generaliter intelligendo legem, dum enim dicitur Officiales prohiberi à contractibus, intelligendū id est de Officialibus, qui extra locū suæ originis negotiantur, Nam si sunt nostrates, illi non prohibentur contrahere, ita intelligit *l. Principalibus.* *Bart.* Quæ interpretatio movere posset Principes, ut indigenas aliunde conquestis Officialibus præferant, Nam lex de aliunde quæsitis nihil boni præsumit, ideo prohibet eis contractus, Ergo reliquum est, ut intelligamus legem loqui de contractu eorum Officialium, qui alienam Provinciā administrant, inter quos tamen ipsos quoque differentia est, sunt enim quidam perpetui, quidam temporales, Perpetui quidē non prohibentur in universum contrahere, sed tantum cum hominibus sibi præpositis. Temporales verò in universum contrahere prohibentur, nisi Respubl., aut necessitas aliud svadeat. Ratio autē quare temporales magis prohibeantur, quā



perpetui contrahere, est, quia in mora parvi temporis est magnum periculum. *l. si debitor. ff. de judic.* Videmus enim temporales Officiales plus satis esse attentos ad rem: si ergo admitterentur promiscuè ad contrahendum, tunc aperiretur fenestra multis rapinis, quod fieri leges prohibent. *Sichard. in C. lib. 4. tit. 3. com. in l. 3. eos qui Officia conjuncta.*

TH. XXV.

Sed non pauci sunt, qui asserunt quod ea, quæ de prohibita emtione à nobis tradita, obtinere tantum in Magistratibus Rom. provincialibus, non autè in urbicis, quod illis major in Provinciis grassandi copia sit, dum tantum fuerint annui, & interea temporis Officiales facile ab ejusmodi contractibus abstinere potuerint, hodiè vero istius legis vim excidisse, postquam Magistratus & Judices cæperunt esse perpetui. *Wesemb. in parat. C. de contract. jud. in fin. Card. Tusch. lit. O. concl. too.* ubi omnes ita distinguunt & addunt, licet temporales non possint contrahere cum iis, qui sunt de jurisdictione, id tamen permissum esse Officialibus incolis in loco suæ originis *per l. presid. 34. ff. si cert. pet.* sunt etiam nonnulli, qui Officiales palam bona fide negotiari posse annuunt, uti statuit *Accursius in l. si emtione §. ult. ff. de contrab. emt. vend. Andreas de Isern. in. c. 1. §. ult. de feudo Guardie. Angel. & Decius in. l. principalibus ff. si cert. pet.* Sed contrariam sententiam nobiscum sustinent. *Jason. Alex. & Zas.* quibus & assentitur *Fachinaeus. contr. lib. 9. cap. 39. quæ probatur per l. un. C. de contract. Judic. vel Eorum & c.* Ubi Imperator prohibet contractus fieri à Rectoribus perpetuis civitatum & à Judicibus, nisi pro necessitate victus,



victus, verba ejus hæc sunt. *Provincias vero moderantibus non solum donationes, sed etiam emtiones quarumcunque mobilium vel immobilium rerum, præter eas, quæ ad alimoniam, vel vestes pertinent, & ædificationes, licet sacri apices aliquid eorum permiserint, penitus interdicimus &c.* quam Constitutionem respiciunt *Fachinæus lib. 2. contror. cap. 78. uti & Decius*, qui addit rationes prohibitionis, partim quod Reipubl. vacare debeant, partim, verò ex eorum contractibus multa mala sequi soleant, timorque impressionis non desit, quanquam alii distinguant, utrum Officium seu administratio Jurisdictione habeat annexam nec ne, ipse Decius tamen hic indistinctè constitutionem ad quemvis Magistratum extendit, ut cesset omnis impressionis timor, & subditi paterne regantur, neque bonis spoliuntur, sicuti facile spoliari possunt ex negotiationibus Rectorum. Nec desunt Regiones, quæ in specialibus statutis editis Justinianæam Constitutionem tanquam saluberrimam approbarunt, ita Argentorati statutum Anno 1626. *Das der Stadt Straßburg Ampt-Deute/ und Bögde uff dem Lande/ keine Güter in dem Ampte/ darinnen sie gesetzt sind/ gelegen/ an sich kauffen oder entlehnen sollen.* vid. *Extract. der Stadt Straßburg Ordnung/ von Contracten*, quod in Decreto Anno 1678. circa jus Retractus emissio ad Officiales, in specie die Amptschreiber extensum est *de jure Municipali Wirtembergico part. 1. tit. 75. fol. 212. §. allerley*. Magistratibus, Judicibus, omnibusque, qui circa eos sunt occupati, emtio venditio interdicta est, hinc etiam allegari meretur, nostra Brunsvicensis ordinatio. Provincialis à quondam Serenissimo ac

Gloriosissimo Duce Brunswicensi & Lüneburgensi Domino Johanne Friderico gloriosæ memoriæ anno 1674. publicata, quæ etiam adhuc in strictissima observatione est, ubi §. 42. reperitur. Und als Uns nicht unbekant/das theils Beampte sich mit vielen Ackerbau beladen/solches aber allerhand Uns nachtheilige Mißbräuche nach sich ziehet/dahero denn solches in denen alten Ampts. Ordnungen nicht unbillig verboten worden. So wollen wir zwar noch zur Zeit bis zu Unserer weiteren Verordnung geschehen lassen/das diejenige Beampte so eigene Güter in denen ihnen anvertrauten Aemptern besitzen/dieselben behalten mögen/jedoch mit diesen ausdrücklichen Bedinge/das Unsere Ampts Unterthanen mit Bestellung derer selben keines weges nicht einmahl Bittsweise/ oder für Erlegunge des Dienst-Geldes beschwert/ oder auch die gemeine Weide mit mehrern Vieh/ als sie den Winter über mit ihren eigenen Futter ausbringen können/betrieben werde. Wes aber sonst ein oder ander an Meyer oder Pacht-Gütern an sich möchte gebracht haben/ deren soll er sich innerhalb Jahres-Frist abthun/und ohne Unsere Special-Zerwilligung dieselbe so wenig leiger behalten/als dergleichen fürters an sich erhandeln/ noch einigen Acker von wüsten Meyerhöfen ohne mehr besagten Unsern gnädigsten Consens, unter den Pflug nehmen/so lieb ihm ist bey seinem Dienst gelassen zu werden/ auch sonst andere willkührliche Straffe zu vermeiden.

TH. XXVI.
Hæc prohibito etiam extenditur ad publicas substationes de jure Municipali Württembergico *part. 1.*
tit. 75.

tit. 75. fol. 212. §. allerley. Magistratibus, Judicibus, omnibusque, qui circa eos sunt occupati, emptio & venditio in publicis subhastationibus interdicta est, etiam per suppositam personam, juxta l. 46. de contr. empt. Speidel. spec. jur. voce Amptleute, eodem jure part. 2. tit. 6. §. Wir setzen und ordnen, fol. 292. Officialibus non competit jus territorialis retractus Landes Ordnunge fol. 41. §. nachdem, & seq. ibi, oder dergleichen Unser Diener sey, quia id veris civibus, & qui onera civilia sustinent, non autem nudis incolis competit. v. Honded. consult. 5. p. 1. Nec obstat, quod Statutum permittat retractum contra die Ausgesessene: Per hos enim significantur, qui cives oppidi vel incolæ pagi non sunt, licet in oppido vel pago commorentur: sicuti ipsa oppositio der Bürger und Ausgesessene arguit. Nihil quoque refragatur, quod Statutum loquatur de Incolis von denen Einwohnern, & ipsi setiam Præfecti cæterique Officiales videantur esse incolæ, siquidem ibi commorentur. Nam per incolas denotantur ibi Cives pagorum, & uti dictioni Bürger respondet Vox Stadt, ita verbum Einwohner eo loco ad vocabulum Dorff refertur. sec. Boccr. tom. 2. disp. 22. de jure retract. ib. 16. Sed si Officialis aliquis in loco ubi Officium gerit, simul civis existat, dubium nullum habere videtur, eum etiam ad retractum admittendum esse, Quia statutum de simplicibus Officialibus, non qui qualitatem civis annexam habent, loquitur, ac proinde quod de civibus disponitur, merito ad tales quoque referendum est. Speidel. c. l. Dn. Müller in comment. ad Syntag. Struv. ex. 23. tit. 1. Verum quoniam per legem & Ordinationem Würtembergicam, cum qua

qua & nostra supra allegata ordinatio Provincialis concordat, ad omnes omnino Magistratus pertineat, æquum est, ut iidem si vè sint cives, aut tantum incolæ, à publicis subhastationibus removeantur.

TH. XXVII.

Committitur (II.) hoc Crimen, si Officialis quod contra mandatum tardius aut mitius suam commissionem aut executionem executurus sit, parti persvadeat, si sibi certam pecuniam numerare, aut hoc aut illud in gratiâ sui efficere velit. *Dambaud. in prax. crim. c. 129.* Judex vero vel Officialis, qui non erubescit tantum facinus perpetrare, agit contra Deum, à quo potestatem suam habet. *Rom. 13.* facit contra justitiam, dum eam propter pecuniam baractat, id est permutat; in dem er das Recht drehet, uti Germani loquuntur, contra debitum sui officii. Quapropter rectissime ille, qui justitiam vendit, aut alio modo pervertit, à *Decian. in tract. crim. l. 8. c. 36.* Satanæ minister vocatur. & *Gig. de crim. lese Majest. tit. de product. qu. 2.* hos Judices rapaces & sordidos appellat, & antiqui hos Judices nummarios appellarunt. Uti & à Cicerone appellantur. *l. 1. Epist. ad Attic.* dum inquit. Quæris ex me in sectandis exagitandisque nummariis judicibus & *pro Cluen.* Varia Judicum genera, nummarii pauci, irati multi, & ibidem paulo infra; Nummarius interpretis pacis & concordie non probatur. *Heckenberg. in disput. inaug. de Barrattaria. cap. 2. n. 1. & 2.*

TH. XXVIII.

(III.) Porro hoc Crimen in Officialibus apparet, si accipiant pecuniâ remittendæ pœnæ ergo, in quam falso
dice-

dicebant subditum incidisse, sed non inciderat, & multo magis gratis relaxandus vel absolvendus erat. Cum qua specie (IV.) ille casus affinitatem habet, quando nempe Officiales scientes citatum non compariturum, multæ extorquendæ causa aliquem ad iudicium sub pœnalibus mandatis sine causa vocitent, & sic multando emungant, vel quando ex metu afflictionis à Magistratu imminentis provincialis fundum ei vendat, qua de re egregiè *l. penult. si per impressionē C. quod met. caus.* agitur.

TH. XXIX.

Mendacio quoque (V.) committi potest Crimen hoc Concussionis ab Officialibus, quamvis expressè non inferatur metus. e. g. Quando Officialis simulat voluntatem Domini, & nomine Domini sui pecuniam seu alias res ab aliquo extorquet, & eas in proprios usus convertit. Quamvis sint qui dicant Concussionis Crimen, nullo modo absque metu fieri, ideoque hi differentiam ponant inter extorsionem & concussionem. Extorsionem ajunt esse, quando nempe Judex subditum tantum indebitè inquietet absque metu. Concussionem autem metum præsupponere. Verum hæc distinctio non magni est momenti, eâdem pœna enim extorsio punitur, qua Concussio.

TH. XXX.

(VI.) Officiales etiam hujus Criminis rei fiunt, si subditos, qui certam quantitatem frumenti debebant. Daß sie entweder von vorigen Jahre schuldig geblieben / oder gegen Aufinsaaß geliehen, post insolitam præcedentis anni sterilitatem & inde valde auctum frumenti pretiū, præcisè cogant ad frumentum (quod ultra necessariam ali-



alimentationem non habent) in natura solvendum, vel secundum æstimationem pretii, quale tum erat, præstandum, quale commercium cum avaritiæ vitio conjunctum, non est ferendum. Videtur quidem hæc nostra assertio contra principia juris impingere, ex eo, quod aliud pro alio invito creditori solvi non possit. *l. 2. l. 8. §. 2. inf. ff. de reb. cred.* & quod in specie de essentia mutui sit, ut res in eodem genere reddatur. *d. l. 2. c. l. 3. in ff. ibid.* sic si debeam frumentum absolutè tener ad reddendum frumentum *d. l. 2.* & secundum ea, quæ habet *Struv. ex. 16. th. 26. c. 32.* Insuper si propter aliquem casum illud ipsum quod debetur solvi non possit, inspiciendum venire quanti res tunc sit, cum deberetur, aut petita esset *l. 22. d. tit.* & si debitor in mora fuerit, maximum à tempore moræ præstandum sit pretiū. *Struv. ex. 16. th. 37.* attamen hisce omnibus non attentis, Christiana charitas, quæ ubique præferenda, & æquitas, quæ in omnib⁹ tanquam theriaca contra venenum spectanda, nos movit ad superiorem assertionem deferendam. Nec obstat, si fortè Creditores dicant, quod sibi frumentum majori jam pretio emendum sit, vel si illud vel retinuisent, vel debito tempore accepissent, hucusque custoditū simili pretio vendere potuissent, & ita per talem denegationē se in gravissimū incurrerē damnū. Nam sibi imputent, quod exactionem in hoc tempus distulerint, *l. damnū ff. de R. J.* vel quod fœnori dederint frumentum, da sic es gegen Musinaasß ausgethan, præsertim quod sicuti in mutuo, magis quam in aliis contractibus improbitas usuraria præsumatur, ita eo magis reprimenda sit. *Mantic. de tac. c. amb. conv. lib. 18. tit. 17.*

¶. 10. & tit. 18. n. 7. quæ improbitas exinde evadit manifestior, quod hi sæneratores jam tale præcisè frumentum nisi der Aufinaas exigant, quod tamen exiguo antea emerant pretio, rursus vero in præsentia annonæ charitate detrectent miseris suis debitoribus, das Korn gegen Landübliche Uffinaas zu lassen oder auszuthun/ sed præcisè pretium, quale nunc est, prætendant, & sic ipso facto leoninam suam conventionem ostendant, contra generale principium juris, quod quionus habet, eundem & commoda sequi debeant. Debent ergo Creditores vel meliora tempora expectare das Korn zusampt der Aufinaas gegen eine neue Aufinaas biß zu vorstehender Erndte stehen lassen, vel æstimationem dati aut debiti frumenti cum aliquo interesse juxta æquum & bonum, quod Judex præprimis superior determinabit, accipere, vid. præprimis Reformat. guter Policen Ordnung. de Anno 1577 tit. 19. §. 2. in. de Anno 1548. tit. 17. §. 2. & ita J. Cti Jenenses in simili casu consulti respondenterunt Anno 1662 Reichard. in resol. jur. resol. 2.

TH. XXXI.

(VII.) Crimini Concussionis quoque hæc species annumerari potest, si nempe Officialis subditos cogat, ut ii fruges & victum sibi, non aliis pro pretio ut ne æquò vendant, nam sapit hoc monopolii speciem, ideò quod ex eo per avaritiam aut cupiditatem statuetur Jason in l. ait Prætor. in pr. 4. ff. de injur. tanquam bono publico contrarium & in tertii præjudicium vergens censetur Gacheran. dec. 17. n. 9. Nec debent subditi obedientiam in ejusmodi ambitiosis decretis, quæ ad Domini propriam utilitatem & cupiditatem cum illorum detrimento

mento fiunt. *Balduin conf. 4. 19. n. 4. Mev. p. 2. dec. 280.* Et quamvis quidam sint, qui tradunt, quod possim colonum meum volentem portionem suorum fructuum vendere, ad hoc compellere, ut mihi vendat iusto pretio, quod tradit *Bartol. in l. n. 3. C. de metallar. & metall.* ubi ait colonum debere potius vendere fructus Domino, quam alii, iusto tamen pretio, cui accedit *Socius. reg. vendere § 30. fol. 2. & alii* attamen textus, quem allegant in *lib. 1. C. de metall. lib. II.* hoc non dicit, sed id solummodo, quod metalla fisco præ aliis sint vendenda, sed si Dominus iustum, id est æquale pretium cum extraneis offerat, edulia ipsi ista pro aliis vendenda, id tamen existimamus magis ex urbanitate, quam legis necessitate faciendum esse. Gravis enim est injuria, quæ inani honoris colore velatur, ut homines de rebus suis cogantur aliquid facere inviti *L. dudum C. de contr. empt.* Unde in Saxonia pro subditis contra Dominos ita pronunciatum testatur *Andr. Raucbbar. p. 2. qu. 22.* ubi inter cætera offert exemplum, de quodam Præfecto vel Capitaneo, qui carceribus & mulctarum indictione subditos eo adigere volebat, ut merces suas commestibiles in arcem deportatas sibi venderent, priusquam illas ad forum deferrent. Cum vero in aula Saxonica Electorali, hi gravem propterea agita- verint querimoniam, audacia inhibita fuit Præfecto, ita, ut ab hac iniqua postulatione imposterum desisten- dum fuerit. Addunt Principem tempore subscripti in- hibitorialis Mandati dixisse, se tantum juris sibi ipsi non sumere, ideoque hoc multo minus Præfecto lice- re, quæ Sententia iustitiæ & æquitati consentanea est.

Carpz.

*carpzo. in J. F. part. 2. const. 51. def. 10. in causa der
Gemeine zu Gleina 1631. pronunciatum his verbis. Ob
wol für Lehn- und Gerichts- Herren Euch bey einer ge-
wissen Straffe auferleget/ das alle Victualien/ so ihr an
Eyer/ Butter/ Gansen un dergleichen zu öffentlichen feilen
Kauff traget/ Ihm zuvor anbieten/ und den Vorkauß
daran jedesmahl vor andern verstatte sollet/ so möget ihr
doch solches zu thun wider euren Willen nicht angehal-
ten werden/ sondern ihr seyd des gethanen Gebots ohn-
achtet/ die Victualien Eurer Beliebung nach zu verkauf-
fen woll befigt. B. N. W. Döppler in seinen getreuen
Rechnungs Beampten. part. 2 c. 1. n. 170. usque ad 176.
Interim hoc saltem intelligendum, quando lucrum ex
ista emtione vel mercatura captatur, non autem exten-
dendum ad indigentiam familiæ aut necessitatem do-
mus suæ. (Wenn die Herrschafft vor Ihre Hofstaat oder
Haushaltung es von nöhten hat) tunc enim ex fide &
dilectione oritur obligatio succurrendi indigentix Do-
mini, & sic Domino Jurisdictionem habenti competit
jus compellendi subditos ad venditionem sibi facien-
dam, modo æquum pretium solvat. id. part. 2. cap. 1.
n. 176.*

TH. XXXII.

(VIII.) Crimine quoque hoc se maculant Officia-
les, si subditos sub spe lucelli arceant ab uno molen-
dino & adigant ad aliud. Nam licet alicujus sub-
diti per longissimum tempus molendinum Domini
adire consueverint, non tamen propterea cogi pos-
sunt, ut ibidem imposterum semper molant. Hartm.
Pistor. obs. 200. Andr. Rauchb. part. 1. qu. 27 n. 2. conse-
ratur

ratur integer tr. Job. Heringii de molendinis eorum-
que jure, it. in specie Eccell. Dn. Petri Mülleri dissert. de
Molendinis Bannalibus von Zwang Mühlen. Ad mo-
lendinum namque ire, est actus voluntarii & meræ fa-
cultatis l. 88. §. testator 5. ff. de leg. 2. l. 2. §. 1. & l. 15. ff.
de precar. ea autem, quæ in mera facultate consistunt,
per præscriptionem non tolluntur l. viam publicam ff.
de via publ. it. Struv. ex 43. tb. 22. nec ex his, quæ gratuito
fiunt, ullo tempore jûs. acquiritur arg. l. 41. qui jure
familiaritatis. ff. de acquir. poss. Besold. in thesaur. pract.
v. Zwang Mühlen. & Borell. in lib. 4. de Magistr. Edict.
cap. 7. per tot. nisi prohibitioni factæ cives & incolæ
per tempus longissimum acquieverint, ista Edicta pro-
hibitoria, ne aliorum ad molendinum vel coquendum
accedant subditi, ambitiosa & ad Dominorum utili-
tatem privatam procurata. Videatur Imper. Carol. V.
pragmatica sanctio de Anno 1554. in Regno Neapoli-
tano publicata, cui adjungit potest in nostro Electo-
rati Sanderheimischer Land-Tages Abscheid de Anno
1661. Dissentit. Dn. Caspar Klock. in tract. de ærario
lib. 2. cap. 14. n. 3. nec dubitat, quin Magistratus, pu-
blica autoritate efflagitante, id necessitate & utilitate
Reipubl. svadente (etiam seclufa præscriptione aut
consuetudine) talia Edicta facere, & subditos ad co-
quendum, molendum in publicis furnis vid. ex Pro-
fesso Dissert. Stryk. vol. 3. disp. 14. de jure Furnorum. c. 2.
n. 92. seq. & molendinis &c. cogere, indeque com-
pendium ærario infarciendum quærere possit, Quod
tamen uti Speidelius in spec. sub voce Zwang / Bau-
Mühlen benè judicat, cum moderamine intelligen-
dum,

dum, etenim, quæ necessitate urgente pro licitis habentur, cessante ea, pro illicitis non immerito aestimari debent. Cum multa necessitatis tempore dicantur licita, & permissa; quæ alias non concederentur. Undè etiam est, quod tempore necessitatis fileant privilegia, *per jur. vulg.* Ideoque si Domini locorum causa cessante, subditos cogere velint, ut in perpetuum & ex obligatione, item sub pœna, molendinâ & furnos suos visitent, gravant. *videatur supra cit. Speidel.* Ut vero subditi ejusmodi in casibus eo securiores sint, protestationibus & aliis competentibus modis & remediis sibi prospiciant. In hac materia notandum est, quod tertio, cujus interest contra Dominum, qui subditis suis mandat, ut in sua tantum mola & non alibi molant, vel quid simile faciant, actio detur, ut sublato mandato, & abrogata prohibitione subditos pristinae libertati & rem in integrum statum restituat, ac de non amplius prohibendo cautionem præstet. *vid. Cöppen. lib. I. obs. 69. in fin. & Andr. Rauchb. part. I. qu. 27.*

TH. XXXIII.

(IX.) Crimini quoque Concussionis accensetur, si Officiales quibus ex retributionibus von denen Haupt- & Gefällen certam summam Creditoribus Principis persolvenda demandata est, solutionem debitam ex causis irrelevantibus injustis tam diu procrastinant, donec sibi certa pars debiti sit promissa, qui modus & usus vel propriè Concussionis excessus hodiè ferè in plurimis Provinciis obtinet, adeò, ut sæpè propria auctoritate, partem sub specie salarii sui exposcant vel retineant, loco excusationis adhibentes, quod communi-

muniter fiat, cenſeri legitimè fieri. *arg. l. certi con-*
dictio 9 §. ſinummos 8. de reb. cred. & excuſationem me-
rerì, qui id fecit, quod conſvetum eſt fieri. arg. l. pi-
gnus. 9. ibi quibus & alii ſolebant publicè uti C. de pign.
act. præſertim quod conſuetudo etiam improba ex-
cuſet à pœna ſaltem temporali in foro externo. Tira-
quellus de pœnis temper. cauſ. 42 n. 2. ſed honeſtas con-
trarium jubet, ac nòmine conſvetudinis indigna eſt
illa obſervantia, quam Officiales lucri cauſa faciunt.
Nov. 134. C. ut nulli Jud. 1. neq; vero ſive unus ſive plures
faciant, quia multitudo errantiũ non illico parit errori
patrocinium. arg. l. 6. §. 1. ff. de Offic. Præſid. & ex actibus
nò liberè frequentatis item fidei contrariis, qui do-
minatum & tyrannidem quaſi ſapiunt, nec conſuetudo
nec præſcriptio induci poteſt. Leyman. in Theolog.
moral. lib. 1. tract. 4 cap. 24 n. n. præſertim cum abuſu
publicæ poteſtatis talia delicta commiſſa videantur.
Struv. in. add. ad differt. crim. X.

TH. XXXIV.

Conatus etiam (X) in hiſce criminibus notatur, ut
eſt ſollicitatio alienarum nuptiarum, quando quis pu-
dicitiam alienæ uxoris attentat: Sic pœnam legis in-
currit, qui ſuppoſitam iuriſdictioni ſuæ mulierem in
thalamum pellicere ſaltem conatur. *l. un. C. ſi quac-*
prædit. poteſt. ita, ut ob ſolum niſum ſeu interpellatio-
nem puniatur ille Officialis, qui Provincialem vi &
metu tentat in uxorem ducere, quia ipſa interpellatio
& attentatio de matrimonio à lege notata & pro deli-
cto habita eſt, licet matrimonium non inſecutum fuerit.
Superſunt quidem aliæ ſpecies huius criminis, inter
quas



quas præcipuè eminet, si Officialis ob lucrum captandum lusui eorum vilissimum vel aliam rem parvi pretii exponat, subditos à Principe suæ curæ commissos ad ludos provocet, qui nolentes volentes vitandæ offensionis gratia ludendo sese associare debent; Sed ne longius excurramus pedem hic circa modos committendi figo, hoc tamen tantum addimus, quod concussionem & impressionem generatim inferre dicatur Officialis, quando quacunq[ue] ratione pecuniam vel aliud quid veniens in commercium quod non debebatur sub prætextu Officii extorqueat, & quamvis subinde liberè & voluntariè similia præstentur, nihilominus contra Officiale præsumitur Concussio, metus & impressio. *Paris de Puteo cap. 7. per tot. & antiquæ usurpatio potestatis criminosa censetur, si sub pallio publici officii omnia ad privatum quæstum referantur. Gigas de crimine læsæ Majest. in tr. tom. 2. part. 1. fol. 47.*

TH. XXXV.

Occasio vero hujus Criminis & harum memoratarum specierum Officialibus nascitur ex Admodiatione, qua Principes architectantur subditis carius justitiam vendendi infinitas occasiones, ut impudenter audeant in subditos grassari. Ideoque melius sibi prospiciunt, si Officialibus suis certa salaria constituent, & quidem talia, ut ex his se & suam familiam sustentare, suisque post mortem alimenta relinquere possint. Nullus enim tam vilis mercenarius dietim operas suas locans reperitur, qui præter id, quod in se alendum impendit, nolit etiam mercedis partem superesse, quodque etiam summe neces-

necessarium, ut eo citius, salariis bene constitutis, à corruptelis, fraudibus & concussionibus se abstineant. Cui & assentitur *Dn. de Seckendorf. in part. 3. des Fürsten Staats cap. 4. ita dicit.* Damit die Rechnungs-Bediente desto weniger Ursache zur Untren haben/darzu machen die Belegenheit des in Händen habenden Einkommens und die Armut verleihtet / werden ihnen billig solche Besoldungen gemacht / auch eine und andere zulässige Ergehunge und zugefällige Gebühren von dieser oder jener Verrichtunge / daß sie damit nothdürfftig hinkommen können. Et æquum sanè est, ut illis, qui sua negligere & bono publico vacare coguntur, ex publico quoque certum & competens salarium constitutatur, ne cum suis egeant. Abhorrent enim ab eo leges, ut sine præmio homines laboriosis officiis præfiantur *§. si quis autem, auth. de Jud.* Et improbus ille labor est, quem præmia nulla sequuntur. Hæc autem salaria ex propriis bonis & redditibus Dominorum sunt constituenda, non ex bonis subditorum, quibus justitia administratur, quia ipsi sunt debitores justitiæ administrandæ, & ob hoc percipiunt redditus. *Garfius de expens. cap. 20. n. 13. & cap. 21. n. 20. Rüdinger, cent. 2. obs. 3. Speckhan, cent. 3. class. 3. quæ 21. n. 7. Munotz de Escobar, de ratioc. cap. 27. n. 4. Oldekop. tit. 2. crim. observ. cap. 2. n. 9. in fin. Speidel in spec. Jur. voce Besoldunge.* Non consultum tamen est Officialibus in pœnis & mulctis salaria constituere, daß sie die Buße und Frevel für ihre Besoldunge haben sollen, quia ex hoc magna incommoda subditis obvenire possent. Undè etiam & hoc ferè communiter improbat, da
man

man denen Aemptleuten zu fleißiger Eintreibung der Straffe/ Frevel und Bussen/ certam partem überläßt. Weil sie alsdenn nicht eben der Fleiß/ sondern die eigene Begierde ihren Vorthell zu haben treibet. *Speidel. spec. voc. Besoldunge.* Unde fit, quod nonnulli horum admodiatorum adfectui & avaritiæ de servientes in multis indicendis & exigendis, remoto omnis pudoris velamento, latentur, vel coloratè excogitatis quibusdam excusatiunculis palliare & tegere conentur malitiosam & legum & litium distorsionem, was ich thue geschiehet Aemptshalber & impiè effuriant hoc modo: Es haben dieses Jahr über die Brüche oder Geld-Busse Gott Lob und Dank ein ehrliches getragen, quasi Deus gaudeat & applaudat litigiosis ejusmodi malitiis & malitiosis litibus, quarum caput est Diabolus. *Valent. Winther. in parth. litig. lib. 1. cap. 14. n. 2. Lather. de censu. lib. 3. c. 15. n. 76. Manz. decis. palat. qu. 15. n. 9. Carpzov. pract. crim. p. 3. qu. 109. n. 42.* Hi enim sunt similes chirurgis, qui ut rusticorum vulneribus, ita hi subditorum delictis gaudere solent, Dieses, dicit *Casspar Zigler. in tractat. de jure mulctandi cap. 10. n. 79.* sind die rechte Bauren-Schinder, welche denen armen Unterthanen die Haut über die Ohren herab ziehen/ dieselbe bis auf den Grad schinden/ und ihnen das Marck aus den Beinen saugen. *Mich. c. 3 v. 3. Ubi Lucas Ofiander.* Die da solten Seug-Ninnen der Kirchen seyn/ aber viel lieber denen Unterthanen das Marck aus den Beinen saugen/ als daß sie dieselbe saugen. *D. Dilber.* hos vocat Geld-hungrige Judas-Brüder, qui ad iniquitatem subditorum sublevant,

animas, ut est apud *Oseam. cap. 4. v. 8.* hoc est sceleribus eorum lætantur, & quibus pro gaudio cor exilit, cum audiant populum multa & grandia peccata designare, ut nimirum uberiora sint pœnarum compendia. Isti hoc agunt, ut loculos suos impleant, & sudore atque sanguine miserorum subditorum pascantur, lusum æstimantes esse vitam illorum, & conversationem vitæ compositam ad lucrum, & oportere undecunque etiam ex malo acquirere. *Sap. 15. vers. 13. Döppler. von ungetreuen Rechnunge. Beauphten cap. 16. n. 39.* Imo hi Officiales irascuntur, si Rationes multarum cumulo refertas non viderint, quamvis eò hoc infelicissimo ævo deventum sit, ut ejusmodi multarum compendia censeantur optimi fructus jurisdictionis, *Gerichte. Gefälle*, unde nonnulli arrogantes officarii contra omnem rationem & æquitatem non erubescunt quotidie pauperes incarcerare, & sumptibus vexare, intrepide sustinentes, ipsis tam jure quam injuria quævis dicere & facere concessum esse.

TH. XXXVI

Tandem eâ occasione majori indagatione non indigna emergit quæstio, si Officiales brevi tempore ad id divitiarum fastigium ascendant, quò vel ipsa fortuna tam subito non ausit pertingere, utrum ex Fiscis sive Domini redditibus, vel aliunde licito modo tantas opes conquisivisse præsumantur? Regulariter enim præsumuntur Officiales ditati ex officio & bonis, quæ administrant, qui non habent patrimonium & stipendium amplum, nec artificium nec negotiationem per tradita à *Peregrino de jure Fiscilib. 6. lib. 3. num. 6.*

Mascard.

Mascard. de probat. concl. 1134. Cardinal. Tusch. lit. C. concl. 95. & 96. Menoch. de præf. lib. 2. præf. 53. Sed Clarus in §. fin. qu. 58. n. 30. verbo Officialis. facit regulam pro Officiali, quod nempe præsumatur licite acquisivisse & dicit, contrariam glossæ opinionem communiter non teneri; quia alias præsumeretur delictum, quod non debeat admitti. Alex. conf. 82. n. 14. lib. 2. Cravet. conf. 244. n. 6. Alii hoc maximè locum habere putant, si Officialis debitam administrationis suæ reddat rationem, & alias non fuit negligens, nec pauperior Iro. Clarus dicto §. fin. qu. 58. n. 30. Lucas de Penna v. facultates. C. de jure Fisci. lib. 10. n. 12. Sed potius est, ut in arbitrio judicis positum sit, qui consideratis omnibus circumstantiis judicabit, an Officialis ex pecunia publica & aliunde sit ditatus. Lucas de Penna d. l. quem sequitur Menoch. de præf. lib. 3. præf. 33. in fin. Tusch. lit. O concl. 95. Mascard. de probat. concl. 1134. Ac certè in allgmeinen Landesvisitationen explorari posset, quale patrimonium, quale salarium, & quas divitias habeat Officialis, ac quomodo eas congerant. Lindensur. in commentario über die Württembergische Landes-Ordnung. Sed linquimus hæc, & transitum facimus ad Actiones, quibus Concussores pulsari possunt.

CAP. III.

De Remediis Contra Concussores Competentibus.

THES. I.

QUO de vera Concussionis specie, de Reo hujus criminis inculato, similiter de Re per metum ex-

torta, ac demum de applicanda iusta pœna constet.,
 Processu ante opus est, qui modo civiliter, ubi agitur
 ad privatum commodum, modo Criminaliter, ut
 vel corpori pœna infligatur, vel quicquam fisco appli-
 cerur, instituendus erit, *arg. l. ult. ff. de priv. delict. l. ult. ff. de furt.* Inter actiones civiles eminet passim actio
 in factum *l. i. ff. de Concus.* cum qua concurrit illa à
 Prætorè suppeditata ex Edicto de Calumniatoribus in
 Eum, qui, ne per contumaciam negotium faceret, pec-
 uniam accepisse dicitur intra annum in quadruplum
 ejus pecuniæ, post annum in simplum. *l. i. pr. & §. pen. l. penult. ff. de Calumn. Donell. 16. 15. cap. 39.* partim
 Condictio ob turpem vel injustam causam in simplum,
 ad Rem metu extortam restituendam: *l. 3. C. de Condict. ob turp. caus.* Concurrat cum his actionibus actio quod
 metus causa, & ipsa intra annum in quadruplum, post
 annum in simplum, sed tamen post annum vix concur-
 rit, quia intra annum quidem datur, & si alia actio sit,
 post annum vero non nisi causa cognita, si alia actio non
 sit. *l. i. l. 9. §. 4. l. 14. §. 1. & 2. ff. quod met. caus.* Nec
 obest, quod *ex l. 7. ff. eod.* objiciatur, timorem alicujus
 vexationis non contineri sub Edicto quod metus causa,
 haud ergo eam actionem concurrere, cum omnis, qui
 concutit, vexet. Rectè quidem Glossa levem ibi vexa-
 tionem intelligendam censet, cujus vanus sit timor, attra-
 men si gravior sit vexatio, veluti, si cum in servitutem
 peterer, minatur quis sit, se instrumenta status mei inter-
 versurum, utique & actio quod metus causa locum ha-
 bet. *l. 8. §. 1. ff. eod.* At si terrore metuve injecto, is qui
 in administratione positus erat rei venditionem ex-
 presse-

prefferit, Venditor ad rem recuperandam & pretium retinendum agere potest *l. pen. C. de bis quæ vi met. caus.* quæ actio nostræ disputationi contra Officiales erit convenientissima.

TH. II.

Ob Crimen Concussionis, si criminaliter agatur, tum proceditur vel per viam accusationis, vel inquisitionis, Accusatio olim erat frequentissima & ordinaria vindicandorum criminum ratio, sic ratione Concussionis datur *ex l. 1. ff. de Concus.* pro delicto coercendo, cum qua ex Legibus publicorum judiciorum concurrit Lex Cornelia de falsis, qua parte lex punit eos, qui in accusationem innocentum coierint, quive ob accusandum, vel non accusandum, denunciandum vel non denunciandum testimonium, pecuniam acceperint *l. 2. ff. de Concus. l. 1. pr. & §. 1. ff. ad leg. Cornel. de fals.* quive altioris ordinis insignia usurpaverint, aut militiam confinxerint terrendi concutiendive causa. *l. eos qui 27. §. ult. ff. eod.* Concurrit etiam Lex Julia Repetundarum, quando crimen Concussionis ab Officialibus secundum in præcedente capite dictum modum committitur, & ille si vè in publica, si vè privata, si vè fiscali causa quid acceperit, de repetundis tenetur, id ipsum enim sordidam concussionem Jctus vocat in *l. 1. §. pen. ff. de Calumn.* Ad actiones quod attinet, una electa, reliquæ perimuntur, nam nec pluribus legibus quisquam reus fieri potest ob idem admissum & absurdum eundem bis coerceri. *l. 24. ff. de accus. l. 17. §. si ante Judicem ff. de Injur.* si vero actione quis expertus fuerit, non tollitur accusatio extraordinaria,

ria; & vice versa, utique si actio rei persecutoria fuerit, aliud si pœnalis.

TH. III.

Cum hodiè accusationum usus sit rarissimus, Inquisitorius vero Processus, quem vocamus, ubi Judex ex officio in Reos inquit atque animadvertit, licet nullus Criminis accusator adsit *l. Præses. 3. l. congruit. 13. ff. de Offic. Præsid. l. 21. §. 24. Ext. de accusat. & inquisit. Ordin. Crim. Carol. V. art. 214. & 219.* frequentissimus *Brunnemann. de Inquis. proc. cap. 1. n. 26. Oldekop. Observ. crim. tit. 2. observ. 3. num. 1.* ita, ut hic quoque ex generali fere consuetudine pro ordinario habeatur remedio. *Carpzow in tr. von Inquisition und Achts-Processen in Präm. & in pract. crim. part. 3. qu. 103. num. 50. & seq.* Ideoque statuimus Judicem hodiè per specialem & plenariam Inquisitionem usque ad Sententiam & ejus executionem ex officio contra Reum Concussionis procedere.

TH. IV.

Quicunque vero Officialem de hoc crimine accusare vult usque ad condemnationem, is certè videat quid agat, maxime enim probare tenetur, crimen hoc esse commissum *l. 6. C. de dolo malo. l. 18. §. 1. ff. de probat. & præsumpt. l. 16. Iult. C. de probat.* Probationes vero quæ adversus tales Judices & Officiales instituantur, debent esse plenæ, urgentes & hinc meridiana clariores *l. quod evitandi. 3. C. de condict. ob turp. caus. l. 12. verbi convicti. C. de dignitat. l. ult. C. de probat. Decian. in tr. crim. l. 8. c. 38. Mascard. de probat. vol. 1. concl. 165. num. 1. & seqq.* præsertim quando criminaliter

ter & ad condemnationem actio instituat, licet civiliter agatur, aliquo modo præsumptiones & conjecturæ locum habeant. *Mascard. de probat. d. l. Struv. ex. 29. 26. 11.*

TH. V.

Possunt autem probationes in hoc iudicio fieri (1.) per testes, necesse verò est, ut testes legitime examinentur, & idonei, legitimi, & omnireceptione majores sint. Et ideo non admittantur testes, qui aliquando ab illo Iudice justè incarcerati fuerunt, vel qui aliquando libellum dederunt contra illum Officialem, quoniam hi omnes sunt suspecti. Admittendos autem esse testes domesticos, quamvis regulariter alias inhabiles sunt. *l. 24. ff. de test. l. 3. C. eod.* (2.) Per juramentum actoris. *Mascard. de probat. vol. 1. concl. 166. num. 2. & 3.* quanquam verò hoc sit dictum de Barrataria attamen ob identitatem rationis ad hoc crimen extendi potest, præterea per confessionem in tortura, vel extratorturam elicitam pari modo ex inquisitione, quæ fit circa libros officiales, Revisione actorum & similibus probatur. *Jul. Clar. §. fin. q. 6. n. 6.*

TH. VI.

Antequam autem Iudex ad torturam vel Sententiam accedat, Reus tam in processu accusatorio, quam inquisitorio audiendus est cum suis defensionibus. *Artic. 47. const. Crimin. Car.* Nec solus Reus, verum & ejus Consanguinei *dict. artic. & Car. 260. part. 3. q. 15. n. 4. & seq.* eum in finem citantur, & cum Reo, tum ejus Consanguineis copia Indiciorum vel processus communicandi, testium Nomina exprimenda *per can.*

qua-

qualiter 24. §. *debet igitur de accus.* nam si nomina Testium supprimantur, Exceptiones excludantur, præbebitur ansa & occasio infamandi & audacia falsum deponendi. *dict. can. qualiter, Carpzov. part. 3. qu. us. n. 19.* sed quæritur, utrum defensio adhuc in notoriis sit concedenda? quod affirmamus, quia in notoriis quoque legitima potest prætendi defensio. *Covar. in pract. Crim. in pr. n. 56. Matth. Steph. ad art. 9. const. Crim. n. 2.* licet enim defensio non faciat ad pœnam tollendam, facit tamen ad eam minuendam, neque ullum delictum adeo notorium est, quin habere possit suas excusationes. *Oldekop. decad. 2. qu. 3.*

TH. VII.

In Republ. Rom. Officialis deposito officio, cum tota familia sua 50. dies commorari debebat, in Provincia, ut interea temporis Provincialibus de Eo querimoniâ commoventibus responderet. *l. un. C. ut omnes Judices tam civil. &c.* Sed si excessisset intra hoc tempus Provinciâ, & querela contra illum moveretur, quod vel ipse vel ministri ejus à Provinciali quid extorssissent, remittendus erat Ex Præses in Provinciam, & ad quadrupli restitutionem condemnandus. *Brunn. in comment. ad l. 1. C. ad l. Jul. Repet.* Interim non minus durante administratione minor magistratus non major ob concussionem conveniri poterat. *l. 4. C. ad l. Jul. repet.* quæ lex in Jure Canon. per *cas. 126. c. 1. qu. 1.* approbata. Apud nos hodiè quivis Officialis quocunque tempore, tam durante officio, quam postea, recte convenitur.

TH. VIII.



TH. VIII.

Civiliter quando agitur actio, haud morte Rei finitur, sed contra heredes etiam dirigitur. *Wesemb. in π. ff. h. n. 5. Arum. disput. π. 25. th. 15. & quidem l. 2. ff. de l. Jul. Rep. datur ulterius, si forte ad eos aliquid extorti pervenisse dicatur. l. 5. ff. de calum. l. 44. ff. de R. J. & si à Reo mortuo lis fuerit contestata l. 20. ff. de Accusat. qualis demum Sententia Concussores teneat, hoc pertinet ad materiam pœnarum, quæ jam subsequitur.*

CAP. IV.

De Pœnis Concussorum.

THES. I.

NE Crimen Concussionis impunitum maneat, uti hoc Reipublicæ utilitas & necessitas efflagitat. *l. 51. §. 2. ff. ad L. Aquil. & unius pœna metus multorum esse possit l. 1. C. ad L. Jul. Repet. leges Concussoribus certas assignarunt pœnas, quæ tamen pro modo admissi, variant, nam alio modo privatæ alio publicæ personæ, inter quas inveniuntur nostri Officiales, cœercentur.*

TH. II.

Generaliter concussionis crimine convictus, Rem metu extortam non solum restituere tenetur, verum etiam extra ordinem arbitrio Judicis puniter *l. 1. ff. h. t. l. 3. C. de cond. ob turp. caus.* pœna quanta extra ordinem sit infligenda non exprimitur. interim si civi-



annum in simplum. *l. i. pr. & §. pen. l. pen. ff. de calumn.*
condemnabatur, ex condictione ob turpem causam in
simplum. *l. 3. C. de condict. ob turp. caus.* ex actione quod
metus causa poena erat quadrupli, intra annum simpli.
l. i. l. 9. §. 4. l. 14. §. 1. & 2. ff. quod met. caus.

TH. III.

Criminaliter si ageretur, ex lege Cornelia de falsis
in liberis hominibus poena erat deportatio, in servis,
ultimum supplicium *l. i. §. ult. ff. ad l. Corn. de fals.* pro
qualitate admisit delicti nonnunquam capitis poenam
in liberos esse statutam confirmat *Paulus v. sent. 25. §.*
qui insignibus. Militantium Concusiones plerique
morte vindicaverunt, cujus rigoris causam reddit
Valerius Maximus lib. 2. cap. 7.

TH. IV.

Sed ut ad eos qui in administratione positi, ut & ad
nostros Officiales perveniamus, ad hos non tantum
supra memorata poenae simul pertinent, verum etiam
si qui ex illis, terrore merue injecto, Rei Venditio-
nem expresserit, Venditor & Rem recuperat & pre-
tium retinet, textus est in *l. pen. C. de his quae vi & met.*
caus. praeterea cum tempore perpetratae Concussio-
nis peculiariter *ex L. Jul. Repet.* teneantur, sequitur
illos poena Repetundis praescripta, olim ejus poena
duplex fuit, nam altera litis aestimationem, altera Exili-
um inferebat, lis aestimabatur vel simpli, dupli, Secun-
dum *Ciceronem in Verrin. 2.* in Jure Justiniano qua-
drupli saltem fit mentio *l. i. & ult. de Assess.* at extra litis
aestimationem non solum exilium sed & Leges Juris
Civilis mortem *l. 7. §. 3. C. ad L. Jul. Repet.* Relegationem

l.38. §. 10. ff. de pen. Verbera, confiscationem *Nov. 8. c. 8. §. 1.* dictant. Exilium sequebatur publicatio bonorum, nec tantum damnati bona publicabantur, sed & mortuo Reo quæstione instaurata heredibus auferebantur. *l. 80. ff. de accus.* quod tamen per *Nov. 134. cap. ult.* abrogatum.

TH. V.


Quamvis apud Nos hodiè pœna Concussionis Officialium admodum rara & insolens sit, & quod Brissoni de adulterii Criminis impunitate in Gallia retulit, de hac in Germania dicere possimus, interim prævia Inquisitione Criminali solet pro circumstantiarum varietate & Judicis arbitrio extraordinem modo multâ pecuniariâ cum remotione ab officio, modo Relegatione aut fustigatione ad exemplum pœnæ Repetundarum hoc crimen compesci. *Carpzov. in prax. Crim. qu. 93. th. 55.* Corodinis loco notandum *Matthæum Stephan. inscriptionem Artic. 129. Constit. Crim. Carol. V.* ad concussionem referre, sed existimamus illum articulum de Diffidatione in qua pax publica violatur, loqui, propterea nec pœna ibi dictata ad Crimen Concussionis, quod extra ordinem punitur, & mitiorem pœnam meretur, extendi debet.

TH. VI.

Addimus demum & hoc, quod Officialis convictus & condemnatus criminis concussionis incidat in infamiam, nam *l. 6. §. ff. ad L. Jul. Repet.* ipsi interdictitur testimonii dictio & est crimen publicum. *Brunn. qu. 10.*



ejus deductionem nobis reservantes in aliud tempus.
Interim cum illo, cum quo cæpi Numine cœlesti, telam
meam claudio, optans, ut is porro studiis meis benedi-
cat eaque ad sui gloriam, meumque emolumen-
tum, promoveat.



DOCTè dum tractas, ALTROGGI *suavis amice!*
Quò pactò crimen, cujus Concussio nomen,
Patretur, qualemque reis, si criminis hujus.
Convicti, pœnam dicent sacra jura luendam,
Suaviter en! Themidem tua virtus concutit ipsam,
Ut tibi promeritos summos decernat honores,
Quèis gaudent legum Doctores atque periti.
Hoc de laudando conatu gratulor imò
Ex animo, pariter tibi prospera queque precando:
Scilicet insensus sis ac durissimus hostis
His, quibus arridet vetita & Concussio prava,
Concutiens justo legum rigore potentes,
Vi sibi concessâ qui audent petulanter abuti.

*Paucis hisce Consultissimo Domino
Doctorando applaudere voluit*

HERMANNUS ZOLL, D.

*& Professor Juris in Academia Rin-
thelienâ Primarius.*

Splendeat æternum Themidis diadema paratum,
Quò tua magnificè frons modò cincta nitet.
Afferat eximios fructus, concedat honores,
Et reddat lætum nobile stemma Tuum.

*Hisce benevolum erga Nobiliss. Dn. Candi-
datum animum contestari voluit*

P R Æ S E S.



*Q*ueritur immensum cur sit Concussio crimen?
In promptu causa est, concutit illa Themis.
Dum Diva sacro mala sub velamine peccat,
Atque ejus Numen commaculare studet.
Fallor, an ALTROGGI sacer horror concutit artus,
Concutiens quando concutit ipse malum.
Concute porrò precor, sic justus, de jero, sic vir,
Vir non conculsâ dexteritate manes.
Et potius decoras circum tua tempora laurum,
Quam quod te laurus. Nam decet bocce viros.

Festinatis hisce memoriam sui Nobilissimo
 Dn. Candidato commendare voluit

CONSTANTINUS NUSLERUS,

Philos. & J. U. D. Decretal. & Moral.

Profess. Ordinar.

*C*ontemplativo dum Jure ALTROGGE refulget,
 Aggreditur praxin Faustus ut, opto, fiet.

Hoc votò prosequitur Clariss. Dn. Doctorandum,
Factorem & amicum suum colendum

CONRADUS LUDEKING,

J. U. D. & P. P.

*S*onti quod POENAS ponit Tibi PRÆMIA digna
 Et vitâ & studiis, non morietur honos.

Nobilissimo Domino Doctorando, Amico suo
honoratissimo amoris honorisque conte-

SCAZON.

*ALTROGGE, præstans patriæ tuæ civis,
Haud segniter te litteras amavisse.
Primis ab annis, & modestiam morum,
Et eleganti seculo quod arridet,
Latus recorder. Quisquis ista conjungit,
Prudentibus placebit arbitris rerum,
Et patriæ probabitur viris summis.
Hæc quanta laus est quam mereris! Exopto
Ut, quod capessis, prosperè decus cedat,
Virtutis illud præmium Tuae magnum.
Quod, si farent benigna fata, proludet
Hominibus majoribus securis.*

Nobilissimo Dn. Doctorando
qualecunque hoc sinceri affectus
monumentum. P.

JUSTUS CHRISTOPHORUS BÖHMER,

Amico veteri.

*S*icut radios Solis umbra,
sic splendorem virtutum tuarum
Sequitur honor
Honor enim est præmium virtutis.
Tuto jam in aciem prodire potes.
Armatus es tantis ingenii dotibus
tanta munitus doctrinâ,
ut multi Clientes consilium tuum
implorent.
Te constituent Defensorem, ne
succumbant

ovantes



ovantes igitur Te Patrono, id quod
petierunt, assecuti sunt.

Tui enim nominis fama apud
gravissimos Viros dudum fuit celebrata
abdidisti Te tempore non exiguo
in Bibliothecam

ut Tua industria prodiret in lucem.

Reconditum fuit tuum studium,
nunc omnibus apertum.

Diu sub Imperatore Justiniano militasti
Tuo sudore

Invidorum pudore

& Nobilissimæ familiæ honore

Stipendia ejus otiosis sunt odiosa,
acri vero ingenio præditis gloriosa.

A teneris bellum, indixisti injustitiæ
multaque in vitâ belle fecisti

Testis est cum aliis multis speciminibus
præsens Disputatio tua

publicæ disquisitioni Nobilissimorum
& Excellentissimorum submissa

Virorum

ex hac patet

doctrina perspicuos te exæquasse
industria vero Te ipsum vicisse

Miror raras ingenii dotes

dignus es non solum hac laureola

sed ut fato fruaris candidiore

Gratulor Clientibus, quibus consiliis tuis
præsto es

gaudeat aliquando Respublica,

que tuæ fidei sese committit



amplectatur & osculetur
 Vos vero reliqui, qui rei literariæ
 operam navatis
 imitamini decorandos hosce conatus
 colligite frondes
 sternite flores
 necite mecum ferta
 ut virtus redimita virescat.
 Laudate ejus doctrinam &
 plaudite.
 Deerit mihi jam tua præsentia
 quia hinc avolo
 non deerit Tibi votum meum
 ut fortuna tua PROCESSUM habeat
 perennem
 Tuque PROCESSUS juris ex voto
 PROCEDANT
 Vale! nec amici desere causam,
 quo pede cœpisti, sic bene semper eas.

*Hisc. Nobilissimum Dn. Respondentem
 prosequi voluit, ut debuit*

JOHANN HENRICH NIEMEYER.

F I N I S.

